

ফুলের ফসল

BANGLADARSHIAN.COM
শ্রীসত্যেন্দ্রনাথ দত্ত

আমন্ত্রণী

ফুলের ফসল লুটিয়ে যায়,
অপ্সরীরা আয় গো আয়;
মৌমাছিরে বাহন ক'রে
হাওয়ার আগে ছুটিয়ে আয়!
পাতার আগায় শিশির-জলে
হেথায় কত মুক্তা ফলে,
লুতার সূতায় দুলিয়ে দোলা
বুলন খেলা খেলবি আয়!
বাসন্তিকা তন্দ্রাভরে
লুটায় বাসর-শয্যা 'পরে,
জ্যোৎস্না এসে মধুর হেসে
মুখখানি তার চুমায় ছায়!
ফুলের তুরী ফুলের ভেরী
বাজিয়ে দে, আয় কিসের দেরী,
ভ'রে দে এই মিহিন্ হাওয়া
মোহন সুরের সুষমায়!
ঝুমকো ফুলের ছত্রতলে
জোনাক-পোকাক চুম্বকি জ্বলে,
সেথায় গোপন রাজ্য পেতে,
স্বপ্ন-শাসন মেলবি আয়!
অঞ্চলে আর অঞ্জলিতে,
মঞ্জরী নিস্ মন ছলিতে,
ফুলের পরাগ কুঁড়ির সোহাগ
নিস্ রে যত পরাগ চায়;
আকাশ ভ'রে বাতাস ভ'রে
গন্ধ রাখিস্ স্তরে স্তরে,
অমল কোমল নিছনি তার
রাখিস্ নিথর চাঁদের ভায়!

BANGLADARSHAN.COM

ক্লান্ত নয়ন পড়লে তুলে
ঘুমাস্ কোমল শিরীষ ফুলে,
শুক তারাটি ডুবলে, না হয়,
ফিরবি ভোরের আব্ছায়ায়!

BANGLADARSHAN.COM

এস

বন-পল্লবে ঘন করি' দিয়ে এস বসন্ত বায়!
পুলকাঞ্চিত করি' ধরণীরে এস লঘু দ্রুত পায়।
এস চঞ্চল! এস প্রসন্ন!
পূর্ণ কর গো যা' আছে শূন্য,
সৌরভে, রসে, সুপ্ত হরষে ভরি' দেহ চেতনায়।
কোকিল কণ্ঠে এস হে রঞ্জে,
এস তরঞ্জে অঞ্জে অঞ্জে,
হরিতে, স্বর্ণে, তরুণ বর্ণে, সুখ-ভরা সুষমায়।
এস অন্তরে, এস হে হাসিতে,
সন্ধ্যা-উষার পুষ্পরাশিতে,
অঞ্চলখানি দীপে দীপে হানি' সঞ্চর জোছনায়।
এস যৌবনে হে চির-কিশোর!
এস মম চিতে ওগো চিত-চির!
নব রবি-তাপে এস গো তাপিত নব-কিশলয়-ছায়।
এস পরিচিত পরশের মত,
সুখ-স্বপনের হরষের মত,
আঁখি-পল্লবে চুম্বন দিয়ে যেয়ো যেথা মন চায়।

BANGLADARSHAN.COM

ফুলের দিনে

ফুলের বনে ফুলের দিনে
আমরা রাজা আমরা রাণী!
মন কেড়ে নিই নানান্ ছলে
আইন কানুন্ নাহি মানি।
আপন হাতে শাসন করি,
বসি' ফুলের আসন 'পরি
চন্দ্রালোকের চাঁদোয়া-তলে
আমরা সবায় মিলাই আনি'!
পাখীর গানে গেয়ে উঠি,
ফুলের সনে আমরা ফুটি,
তটিনীর ওই তরল-গাথায়
সরল হৃদয় লই গো টানি'!
ফাগুন রাতে হাওয়ার সনে
হেসে বেড়াই বনে বনে,
লুকিয়ে শুনি কৌতূহলে
পাতায় পাতায় কানাকানি!
মোদের হাসি মোদের গীতি
জাগায় নিতি নূতন প্রীতি,
ফুলের ফসল ফলায় আসল
মোদের মুখের মঞ্জুবাণী।

BANGLADARSHAN.COM

ফাল্গুনী হাওয়া

কখন এলো গো ফাগুন বাতাস

ওগো চির-সুমধুর!

কখন রিক্ত লতারে পরায়ে

দিলে এ রতন-চুর!

পথে প্রান্তরে ঝলমল করে

ফুলকাটা কিঞ্জাব,

আমের মুকুলে অশোকে বকুলে

তোমারি আবির্ভাব!

পান্না চুনীর কণ্ঠী পরেছে

টিয়া আর চন্দনা,

পুলকিত হিয়া কোকিল পাপিয়া

গাহে তব বন্দনা!

ঘন ভুরু জিনি' যব শীষ যত

শিহরি উঠিছে সুখে,

মউল ফুলের বারতা এসেছে

মউচুষ্কির মুখে!

চুমকি হাজার বসেছে আবার

আকাশের মখমলে,

হিম যামিনীর কালো পেশোয়াজ

ফিরে আজ ঝলমলে।

কখন আসিলে অতিথির বেশে

বহু জনমের বঁধু,

শিশির-নিশির অশ্রু হরিলে,

অধরে ধরিলে মধু!

BANGLADARSHAN.COM

মৌন বিকাশ

ওগো আজকে তোমারি আঙিনার কোলে
মুকুল মেলিল আঁখি!
ধূলির কোলে সে কোথা হ'তে এল
স্বর্গ-সুখমা মাখি'!
এনেছে সে শোভা এনেছে গো হাসি,
অঙ্গ ভরিয়া সৌরভরাশি;
তাহারি রূপের মাধুরি হেরিয়া
কুহরি' উঠিছে পাখী!

ওগো সে এসেছে যে,
তারে আরতি করিয়ে নে;
বনের দুলাল দুয়ারে তোমার
তাহারে লহ গো ডাকি'।
চোখে কত কথা করে ফুটি-ফুটি,
মু'খানিতে কত হাসি লুটোপুটি,
কত ফাগুনের কাহিনী এনেছে,
ওগো, সে শুনিবি না কি?

কিরণ দোলায় সে
মৃদু বায়ুভরে দুলিছে
ঘন পল্লব-সিন্ধু-লহরে
মুকুতার ছবি আকি'!
কত কথা যেন চাহে সে সুধাতে,
কি বারতা যেন এসেছে শুনাতে,
ধূলি-পিঞ্জর খুলি' কৌতুকে
এসেছে মৌন পাখী।

BANGLADARSHAN.COM

কুঁড়ি

জড়সড় কুঁড়িটি আজ কে গো ফোটালে!
কোন্ চাঁদে আজ চুমা তোমার দিলে কোন্ গালে!
কোন পরীতে ও মুখ চেয়ে
উড়ে গেল কি গান গেয়ে!
কোন সরিতে উঠলে নেয়ে! কি রূপ লোটালে!

BANGLADARSHAN.COM

পুষ্পময়ী

স্বজনি! তোর অঙ্গে ফুলের বাস!
ফুলের মতই হাসিস!—ও তুই
ফুলের মতই চাস!
কোন্ দেবতার কুঞ্জবনে
ছিলি গো তুই কোন্ ভুবনে,
কোন্ রজনীগন্ধা তুমি
ফেলিছ নিশ্বাস!

প্রেমাভিনয়

আয় সখী, তোরে শিখাই আদরে
ভালবাসাবাসি খেলা!
কাছাকাছি এসে অকারণে হেসে
শেষে ভালবেসে ফেলা!
না চাহিতে-পাওয়া ধন সে, স্বজনি,
ভালবাসা তার নাম,
যে তোরে জেনেছে হৃদয়ে টেনেছে
নাহি তার বিশ্রাম!
আকাশের বুকে ফাঁদ পেতে সুখে
চাঁদ নিয়ে হেলাফেলা,
হাসিতে হাসিতে ঘুমায়ে নিশীথে
আঁখিজলে আঁখি মেলা!

BANGLADARSHAN.COM

মহুয়া ফুল

যায় যে ব'য়ে ফাগুন-রাতি, কই গো রাজবালা!
আমায় নিয়ে গাঁথবে না আর স্বয়ম্বরের মালা?
রসে ভরা ফলের মতন নিটোল সোনা ফুল,-
ধূলায় শেষে ঝরব? হব' ধূলার সমতুল?
ফলের পরিপূর্ণ ছাঁদে শোভন আমার কায়,
সফল করি সোনার স্বপন, ভুলছ কি তা'? হয়!
কাঁচা সোনার কোঁটা আমি রসেতে ভরপুর,
তোমার মত হে সুন্দরী মদির-সুমধুর।
মনে যারে ধরবে তোমার চাইবে যারে মন,
তোমার হ'য়ে তারেই আমি করব আলিঙ্গন,
সরম তোমার রইবে অটুট পূরবে আকিঞ্চন,
আমায় দিয়ে হ'বে তোমার আত্ম-নিবেদন।
কন্যা! আমি সকল দিকে তোমার সমতুল,
বাহিরখানি ফলের মতন, মরমখানি ফুল!
ফাগুন রাতি যায় পোহায়ে কই গো তুমি কই?
স্বয়ম্বরের মালার মোতি-ধূলার শরণ লই!

BANGLADARSHAN.COM

জ্যোৎস্নায়

আমার পরাণ উথলিছে আজি
না জানি কিসের হরষে!
সারা তনুখানি উঠিছে শিহরি'
অজানা এ কার পরশে!
কলঙ্কী চাঁদ হাসিয়া, আমায়
ঘরের বাহির করিবারে চায়,
দেবতার প্রিয় সুধা সে আমারি
অঙ্গ প্লাবিয়া বরষে!

BANGLADARSHAN.COM

গান

মুকুলের মুখ আল্গা হ'ল
হাল্কা হাওয়াতে!
সাগরের বুক উঠল দুলে
চাঁদের চাওয়াতে!
আপন-ভোলা স্বপন এসে
সকল পণই গেল ভেসে,
ভেসে গেল নন্দনেরি
বনচ্ছায়াতে!

লতার প্রতি

ওগো নবীনা লতা!
কেন দোলায়ে পাতা
বাতাসে জানাও
কচি কুঁড়ির কথা!
এই তো সকল
শাখা উঠিছে পূরি',
এই তো নকল
রাখী বাঁধিছে ঝুরি!
নহে বিহ্বল
আজো বহুল পাতা;
এখনি কেন গো
এত চঞ্চলতা?
এখনি জাগিল
কিও পুলক-ব্যথা,—
তরণ পরাণে
কোন্ নব বারতা!

BANGLADARSHAN.COM

গান

আজি এই সাঁঝের হাওয়ায়
দুলে ওঠে ফুলের ভুবন!
দুলে ওঠে ফুলের সাথে
ফুলের মত মঞ্জুল মন!
এত ফুল কোথায় ছিল?
কোথায় ছিল এত হাসি?
উধাও-করা ফাগুন-হাওয়া,
সোহাগ-ভরা জ্যোৎস্নারশি!
প্রাণে আজি লাগছে মোহ,
কে যেন কী রাখছে গোপন!
স্বপন আজি ফল্বে বুঝি
মিল্বে বুঝি দুর্লভ ধন।

BANGLADARSHAN.COM

অশোক

মুকুল-ভোজী কোকিল এল কুঞ্জে!
ভ্রমর পাঁতি দিবস রাতি গুঞ্জে!
মুঞ্জরিয়া উঠিনু মোরা হর্ষে
অরুণ-রাগে তরুণ আলো স্পর্শে!
এসেছে পিক অরুণ তার নেত্র!
অশোক ফুলে অরুণময় ক্ষেত্র!
শীতের সাথে শোকের স্মৃতি নষ্ট,
তরুণ আজি,—ছিল যা' কীটদষ্ট;
রসের লীলা চলেছে দিবারাত্রি!
পাটল পথে মিলেছে প্রেম-যাত্রী!
হরিতে শোক অশোক ফুটে পুঞ্জে!
মুকুল-ভোজী কোকিল এল কুঞ্জে!

BANGLADARSHAN.COM

গান

কেন নয়ন হয় গো মগন
মঞ্জুল মুখে!
কেন হৃদয় ভিখারী হয়
রূপের সমুখে?
মর্ত্য মানুষ চাঁদের লোভে
কেন মরে মনের ক্ষোভে
বুকে ধরে বিদ্যুতেরে
হায় সে কোন্ সুখে!

BANGLADARSHAN.COM

ধারা

ওগো এমনি ধারাই হয়!
ফুলের যখন হয় প্রয়োজন
ফাগুন-হাওয়াই বয়!
তৃষ্ণা-করণ বাজলে কেকা,
শূন্যে ফোটে স্নেহের লেখা,
চুম্বনেরি চমক লাগে
আকুল ভুবনময়!

জ্যোৎস্না-মেঘ

জোছনা-ঝরানো ভুবন-ভরানো
ওগো চাঁদ! ওগো জ্যোৎস্না-মেঘ!
আলোক প্লাবনে গগনে, পবনে,
ভুবনে ধরে না পুলকাবেগ!
জোছনা-বরষা নামিল গো,
তিতিল সকল দেশ!
ভরিল নিখিল ভাসিল গো,
ধরিল নূতন বেশ!
ঘুম-ঘোরে কত স্বপন-মুকুল
পুলকে মেলিল আঁখি আধেক!

BANGLADARSHAN.COM

গান

চাঁদেরি মত চির সুন্দর সে
চাঁদেরি মত চিরদিন সুদূরে!
সুধা বরষে শুধু হাসে হরষে
সুন্দর সে-হেসে চায় মধুরে!
চিরদিন সুদূরে!
তারে ধরিতে নিতি পাপিয়া এসে
রেশমী সোপান গাঁথে সুরের রেশে!
ফাগুনী বায়ে সে যে ফিরায় পায়,
-গুণ্গুণিয়া শুধু রুণ্ৰুণিয়া-
দিন দুনিয়া কাঁদে তার নূপুরে!

BANGLADARSHAN.COM

অনুরোধ

মোহন মুহুমুহু কেন সখী চায়?—
মানা ক'রে আয়!
(আমি) পরাণ ভরি নারি দেখিতে যে তায়,—
লাজে মরি, হয়!
গুপ্ত আরতি মম গোপনে সে রাখি রে,
সে এসে চাহিলে মুখে বসনে সে ঢাকি রে!
নয়ন-মন মম তবু তারি পায়!

কুণ্ঠিতা

আমি আপনি সরমে মরমে মরিয়া যাই রে,
নিতি আপনার ছবি নিরখি' মুকুর মাঝারে;
আমি কেমন করিয়া বাহিরিব ভাবি তাই যে,
হায় দেখা দিব আমি কেমনে আমার রাজারে!
মোর কিছু নাই রূপ কিছু নাই কিছু নাই গো,
শুধু আছে ভিখারীর স্বপ্ন-শরণ দুরাশা;
তবে ফিরে যাই দূরে সরে যাই মরে যাই গো,
হায় মরু-মাঝে নিয়ে যাই এ আমার পিপাসা
জানি সুদুঃসহ সে সূর্য্য সমান, হায় গো,
তবু তাহারি আশায় জেগে আছি আমি রাত্রি
যাব মাটিতে মিশায়ে সরমে, সে যদি চায় গো,
হায় মরণ-পথের যাত্রী-কৃপার পাত্রী!

BANGLADARSHAN.COM

যদি

যদি কুসুম-শরে হৃদয় বেঁধে
তবে কেঁদ না
সে যে ফুলের সুখ-পরশ মাঝে
মৃদু বেদনা।
সে যে দিনের দাহে কুঞ্জ-ছায়ে
স্বপ্ন আনে বিভোল বায়ে,
ঘুমের শেষে আলোর দেশে
আধ-চেতনা।

BANGLADARSHAN.COM

স্বপ্নময়ী

স্বপনের মতো এসে চলে যাও
রেখে যাও মনে আবেশখানি!
নয়নের কোণে হেসে চলে যাও,-
মূল্য তাহার আমিই জানি।
জোছনা সমুখে থমকি' দাঁড়ায়,
বনের কুসুম মু'খানি বাড়ায়,
তরু-পল্লবে পলক পড়ে না
পাখীর কর্ণে মিলায় বাণী;
ফাগুনী হাওয়ায় ভেসে চলে যাও
পরাণে পিয়াও অমিয়া ছানি'।

চোখে চোখে

চোখে চোখে মিলন হ'লে
মুখে ফোটে হিরণ হাসি!
শিউলি ফুল আর ভোরের তারার
মতন ভালোবাসাবাসি!
যদি সে কথা না কয়,
না যদি হয় পরিচয়
তবুও নিতান্ত আপন
গোপন প্রাণের কিরণ-রাশি।

BANGLADARSHAN.COM

গান

যদি তোমার চোখের আলোয়
কোথাও ফোটে সুখের হাসি,
ধন্য তবে জীবন তোমার
তোমার পথে ফুলের রাশি।
তোমার স্মৃতি তোমার গীতি
কোথাও যদি জাগায় প্রীতি
তবে দুখের ফণায় বসি'
সুখের সুরে বাজাও বাঁশী।

মনের চেনা

মন যারে চেনে নয়ন চিনায়
সেই সে আমার পরাণ-বঁধু;
পাত্রে পাত্রে নাই সুধা, হয়!
পুষ্পে পুষ্পে নাহিক মধু।
নয়নে নয়নে নাহি উল্লাস
সকল তারায় নাহি শোভা;
অধরে অধরে নাহিক তিয়াষ,
তরণ জনের পরাণ-লোভা!
মন চেনে শুধু সে দু'টি নয়ন
যে নয়নে হাসে প্রাণের আলো,
হিয়ার মিলন হোক সে ক্ষণিক
ভালোর আলোর কণাও ভালো;
সেই অমরতা সেই বাঞ্ছিত
নন্দন-বন-কুসুম-মধু;—
অমৃত-সিন্ধু-সলিল-বিন্দু
মরমে বরষে অমর বধু!

BANGLADARSHAN.COM

গান

আমার পরাণ ঘিরি' ফুটল কুসুম
তোমার হাসিতে,—
তোমার চোখের সিঞ্চ-সরস
জ্যেৎস্না-রাশিতে!
নন্দনেরি মন্দার-হার
লুটায় যেন অঙ্গে আমার
অজানা আনন্দে হৃদয়
রহে ভাসিতে!

BANGLADARSHAN.COM

নীরবতার নিবিড়তা

ভালোবাসে কি না কেন সুধাইবি, আঁখি-জলে, ওরে

সুধাস্ নে;

ক্ষীণ আলোখানি ঘরের বাহির করিস্ নে, ঝড়ে

নিভাস্ নে।

নত মুখে যায় আঁখি-কোণে চায় প্রাণে নেবে ঐকে

মূরতি যেন,

তরণ অধরে হাসিটি মিলায় বরিষার মেঘে

রশ্মি হেন!

(তবু) চাস্নে চোখের কোণে তার পানে, আপনারে তুই

বিকাস্ নে!

কঠোর হয় রে করুণ দৃষ্টি, হাসি ঢালে শেষে

গরল-রাশি,

তবু কি পাগল বলিবি ফুটিয়া, 'ভালোবাসি, ওগো

ভালো যে বাসি!'

(তোবে) মানা করি, ওরে যাস্নে, প্রাণের মধুর স্বপন

ঘুচাস্ নে!

নয়নে নয়ন, -হয়েছে মিলন; অঙ্কিত থাক্

হৃদয় ছবি,

সে হোক প্রাণের পূর্ণিমা রাতি, -মধু সমীরণ,

বিভাত রবি;

(তবু) ক'সনে গো কথা, দিস্নে বারতা, ভালোবাসা তুই

জানাস্ নে।

BANGLADARSHAN.COM

গান

হায়! বারণ করে!
বারণ শুনি' –কি গো–তটিনী ফেরে?
তবু, বারণ করে!
চরণ ধ্বনি–তার–যখনি শুনি
বুকে সে বাজে–লাজে–কথা না সরে!
আপনা ভুলি'–হায়–দু'আঁখি তুলি'
উছলি' চলি–খোলা–ঝরোখা 'পরে।
হায়! বারণ করে!
বাদর ঝরে–বল্–তাহে কে ডরে?
সাগরে ভাসি'–কেবা–শিশিরে মরে?
কঠোর স্বরে–তবু–বারণ করে,
ভুবনে ফিরি–আমি–স্বপন ভরে!

BANGLADARSHAN.COM

আপন হাওয়া

তোরা জানিস্ কি নিতান্ত পরের
আপন হওয়ার সুখ?
তোদের উদাস আঁখি কারেও দেখি'
হয় নি কি উৎসুক?
নূতন প্রেমের নূতন সুখে
হাসি দেখা দ্যায় নি মুখে?
পূর্ণ চাঁদের আলোয় তোদের
পুরে নি কি বুক?

বাঁশী

আমি জানিনা বাঁশীতে কি যে আছে, সুখ
পথের পথিক বঁধু!

কোন্ গোপন মনের দুখ-সুখ-মাখা
হৃদি সঞ্চিত মধু!

সে যে অধর-পরশে চকিতে জাগিয়া
ফুকারি উঠিছে ডাকি;

ওগো বাঁশীর মাঝারে ধ'রে কি রেখেছ
ভুবন-ভুলানো পাখী?

সে যে সোহাগ-পাগল দুলালের মত
অভিমাণে ফুলে' ফুলে'

হায় আমারি পরাণ-পিঞ্জর 'পরে
বার বার পড়ে ঢুলে।

তার তানে যে এখনো উঠিছে উলসি'
কাননের কলহাসি,

তার সুরে মুহুমুহু মছয়া ফুলের
নেশা উঠিতেছে ভাসি',

ওগো লুকায়ে তাহারে রেখো না নিভুতে,
আমরা নেব না ধরি';

তারে মুক্ত সমীরে ছেড়ে দাও ফিরে
নহিলে যাবে সে মরি'।

সে যে চঞ্চু হানিয়া পরাণ-পুষ্পে
লাজে স'রে গেল ধীরে,

সে যে না জেনে দু'আঁখি করেছে সজল,
আহা সে আসুক ফিরে।

ওগো শুধু একবার জাগাও তোমার
বাঁশী-বাসী পাখীটিরে,

ওগো স্বর্গসুখের সুষমা আবার
লাগুক হৃদয়-তীরে।

ফিরে নয়নে লাগুক স্বপনের নেশা

তপ্ত ললাটে হাওয়া,
আমি না পেয়ে পাব গো পরাণে পরাণে
চেয়ে যা' যায় না পাওয়া।
মোর মনের কামনা প্রাণের বাসনা
মূরতি ধরিছে আজি,
মোর যত ভোলা গান পেয়ে নব প্রাণ
আকাশে উঠিছে বাজি'!
বঁধু একি করিলে গো বাঁশীরে জাগায়ে
পথের পথিক, সখা!
মোর পিঞ্জরাহত পরাণ-পাখীর
চঞ্চল হ'ল পাখা।
হায় সুদূর অতীতে এমনি একদা
বাঁশরী বাজায়ে পথে,
মোরে উন্মাদ ক'রে কে যেন গিয়েছে;
সে অবধি কোনো মতে
আমি পারি না বাঁধিতে হৃদয় আমার
মন ছুটে বাতায়নে,
শুনি উঠিতে বসিতে বাঁশী চারি ভিতে
ঘুম নাহি দু' নয়নে।
সে যে কাননে বাজিছে মর্ম্মর রবে
কল্লোল নদীজলে,
সে যে গগনের তলে গানে কোলাহলে
ধ্বনিছে শতেক ছলে;—
তাই উন্মাদ আমি তৃষিত নয়নে
দুয়ারে ছুটিয়া আসি;—
ওগো গগনে, পবনে, পরাণে আমার
নিয়ত বাজিছে বাঁশী!
ওগো পথের পথিক! ওগো সখা মোর!
কি বাঁশী আনিলে, বঁধু।
মোর নয়ন ভরিয়া উঠিল সলিলে,
একি বিষ! একি মধু!

BANGLADARSHAN.COM

গান

গান গেয়ে হয় কে যায় পথে
কান দিয়ো না তায়!
কেঁদেই যদি মরে বাঁশী,
কার কি আসে যায়?
মন যদি হয় কেমন করে
সায় দিতে চায় বাঁশীর স্বরে
ভুলেও তবু এস না, হয়,
মুক্ত জানালায়।
লাজুক বাঁশী বাজুক বনে, -
কাঁদুক একা আপন মনে,
তুমি থাক খাঁচার পাখী!
সোনার পিঁজরায়!

BANGLADARSHAN.COM

চির সুদূর

এত কাছে থেকে হয় তবু এত দূর!
নয়নে নয়ন রেখে পরাণ বিধুর!
কাছে আসি ভালোবেসে, -
নিশাসে নিশাস মেশে,
নাগাল না পাই তবু পরাণ-বঁধুর!

হাসু হানা

গন্ধভরা হাসু হানা

তুলেছিলাম গুচ্ছ ক'রে;

তখন কেবল সন্ধ্যা নামে

পরাণ ভরে নানান্ সুরে।

কপোলতলে ওষ্ঠাধরে

তপ্ত দুটি নয়ন 'পরে

নিয়েছিলাম স্নিগ্ধ-সজল

কোমল পরশ সোহাগ ভরে।

সান্ধ্য ফুলের গন্ধ মদির

পরাণ আমার করলে অধীর,

তপ্ত হয়ে পড়ল নিশাস

কে জানে হয় কিসের তরে!

সন্ধ্যা ফুরায় একা একা,

এখনো হয় নাইকো দেখা,

নেতিয়ে প'ল হাসু হানা

পরাণ সাথে ক্লাস্তি ভরে!

সায় দিলে সে মনের সনে,

অশ্রু সনে পড়ল বা'রে।

BANGLADARSHAN.COM

স্বৰ্ণমৃগ

সোনার হরিণ চলে গেল হয়

মনোলোভা রূপ ধ'রে,

বিস্মিত হিয়া রহিনু চাহিয়া

তাহারি পথের 'পরে!

আঁখি পালটিতে ফিরে দেখা দিল,-

গেল ফিরে লীলা ভরে;

আকুল নিশাস পড়িল আমার

পাঁজর শূন্য ক'রে।

BANGLADARSHAN.COM

উন্মুনা

একটি জোড়া চোখের দিঠি ফিরত না,
দেখতে পেলেই ফিরে ফিরে চাইত;
আজকে আমি তাহার লাগি উন্মুনা,
আজকে সে আর নাইত' কোথাও নাইত'!

দেখিনি তায় সকাল বেলায় মন্দিরে,
বৈকালে সে ঝর্ণা-তলায় যায়নি!
খুঁজেছি সব শৈল-পথের সন্ধি রে
তবুও তার দেখা কোথাও পাইনি।

আজকে দেশে ফিরতে হবে আমায় গো
কোথায় তুমি চারু-চোখের-দৃষ্টি!
এস বারেক আমায় দিতে বিদায় গো,
দৃষ্টি করুক প্রসাদী ফুল বৃষ্টি।

প্রাণের এ ডাক শুনতে কি গো পেলেই না?
প্রাণের এ ডাক পৌঁছাল না মর্মে?
চারু চোখে চাইলে না আর এলেই না?
না জানি ডাক পৌঁছাবে কোন্ জন্মে।

BANGLADARSHAN.COM

বিরহী

গাঙে যখন জোয়ার আসে
থেকো তুমি সাগরে;
ওই পরশে সরস বারি
মাখব অঙ্গে আদরে।
হারা আমার হিয়ার টানে
চেয়ো বারেক তারার পানে,
পড়ব দৌহে দৌহার লিপি
আকাশ-ভরা আখরে!

BANGLADARSHAN.COM

স্বপন

স্বপন যদি সত্যি সফল হয়!
(তবে) তোমায় আমায় এই যে প্রণয়
আবার হবে মধুময়!
জগৎ যদি ফিরায় আঁখি
তবু আমি ভরসা রাখি
হ'ব সুখী, ফিরবে সুদিন,-
হৃদয় আমার কয়!

ঘূর্ণি

আজ ফুলের বনে দখিন হাওয়া
কী ব'লে গেছে!
অকূল পাথার থির জোছনায়
ঘূর্ণি লেগেছে!
মূর্ছনাতে পড়ছে টলে
মূর্ছা রাগিনী!
পদ্ম 'পরে নৃত্য করে
মত্ত নাগিনী!
ও তার বিষের নিশাস কুসুম-কলির
বুকে বেজেছে।
ঘূর্ণি লেগেছে!

হায় আপন জনে বুকে টেনে
পাইনে খুঁজিয়ে!
তপ্ত ধারা মোচন করি
চক্ষু বুজিয়ে!

সেই অশ্রু নিয়ে পূর্ণিমা-চাঁদ
অঙ্গে মেখেছে!
ঘূর্ণি লেগেছে!

আজ চোখের আগে কেবল জাগে
মৌন দু'আঁখি!
পাতার রাশে পাতার বরণ
বলছে কী পাখী!

ওগো অকূল সাগর মথন করে
কি ধন জেগেছে!
ঘূর্ণি লেগেছে!

BANGLADARSHAN.COM

চৈত্র হাওয়ায়

এই চৈত্র হাওয়ায় চেতন পাওয়া
মন্দ নয়,—
যখন চাঁদের আলোর অঙ্গ বেয়ে
চন্দনেরি গন্ধ কয়!
স্বর্ণ চাঁপার সুপ্ত মুখে
চুমার অঙ্ক আঁকতে সুখে
যখন আনন্দেরি অশ্রুজলে
আঁখি খানিক অন্ধ হয়।

BANGLADARSHAN.COM

কেন

আজি গোলাপ কেন রাঙা হ'য়ে
উঠল প্রভাতে!
হাজার ফুলের মধ্যখানে
নূতন শোভাতে!
পঙ্কুঘেরা আঁখির পাতে
স্বপন লেগেছিল রাতে,
চাঁদ বুঝি তায় চুমেছিল
নিশির সভাতে!
তাই সে অধর কাঁপছে, বুঝি
স্বপ্নে পাওয়া পরশ খুঁজি!
অরুণ হ'য়ে উঠছে সে কার
পরাণ লোভাতে!

তাই

আমি তাইতো বলি গোলাপ কলি
আজ কেন উৎসুক।
তার বুকের নীড়ে এল ফিরে
হারানো কোন্ সুখ!
আজ কোকিল ডেকে বললে তারে,—
আর ঘোমটা দিতে হবে না রে
ওই দেখা যায় বসন্তেরি
প্রসন্ন সেই মুখ!
শীতের শাসন টুটেছে আজ
মৌনী হিয়ার ছুটেছে লাজ,
গুঞ্জরিছে গোপন পুলক
মুঞ্জরে কৌতুক!

BANGLADARSHAN.COM

গোলাপ

আমি ছিনু শোভাহীন নিঃস্ব মরুদেশে,
আমি ছিনু বাবলার সাথী,
প্রেমিক পথিক এসে মোরে ভালোবেসে
আমারে ফুটালে রাতারাতি!

রাঙা সে করেছে মোরে অনুরাগ দিয়ে
অশ্রু দিয়ে করেছে সুরভি,
করেছে সুষমাময় সোহাগে ঘিরিয়ে
পাগল সে পথভোলা কবি!

তাই আজি বুলবুল্ গাহিছে নিয়ত
মধু-মদ-গন্ধে মাতোয়ারা,
ঘন পাপড়ির মাঝে মাতালের মত
মৌমাছি ফিরিছে দিশাহারা।

তাই আজি দ্বন্দ্ব করি সমীরের সাথে
কুঞ্জে অলি করে গতায়তি,
সুরে সুরে মশগুল পাপিয়া সে গাঁথে
মোতিয়ার কুঁড়ি সনে মোতি!

দীর্ঘ জীবনের দিন গণিয়া গণিয়া,—
কাঁটার না দেখি' অবসান,—
ভেবেছিনু সুখহীন সুখের দুনিয়া,
ছিনু তাই চির-হ্রিয়মাণ।

মানুষের প্রেমে আজি সফল জীবন
দুঃখ আর নাহি এক রতি,
গরবী গোলাপ আমি ভুবন-লোভন,—
কণ্টকের আমি পরিণতি!

BANGLADARSHAN.COM

গান

পিয়াও মোরে রূপের সুধা
রূপের সুরা পিয়াও তাই!
এক নিমেষের একটু হাসি
তাহার বেশী নাহি চাই।
এসেছি সব ভিন্ন পথে
ভিন্ন পথেই থাকব যেতে,
শুভক্ষণের সুখ-স্মৃতি,-
তাই যেন গো পাই।
আঁখির সুধা বৃষ্টি কর,-
দিনে স্বপন সৃষ্টি কর,
হাসিতে ফুল ফুটাও গো,-যার
হয় না কোনো তুলনাই!
স্বর্গসুধার,-হে অঙ্গুরী!-
একটি কণা যাও বিতরি',
তোমার পারিজাতের মালার
একটি শুধু পাপড়ি চাই!

BANGLADARSHAN.COM

জ্যোৎস্না-অভিষেক

ওগো রাণী! তোমার আজি জ্যোৎস্না-অভিষেক
সজ্জা রাখ, লজ্জা রাখ,—চন্দ্রমা নিশ্চেষ্ট!
অলকগুলি বাতাস ভরে
দুলুক তোমার ললাট ‘পরে,
উথলি’ লাষণ্য-বারি অন্ধ করি’ দিন ক্ষণেক!
মর্ত্য-লোকের দৈন্যরাশি
ঘুচাক,—চাঁদের দিব্য হাসি,
তোমার হাসি করুক প্রাণে চন্দন-নিষেক!

BANGLADARSHAN.COM

করবী

দূর হ’তে আমি গোলাপেরি মত ঠিক!
তবু আমোদিত করিতে পারি নে দিক!
গোলাপেরি মত অতুলন মম হাসি,
তবু হয় অলি ফিরে যায় কাছে আসি’!
পথের প্রান্তে ফুটে আছি অহরহ,
গোলাপের মত রচিত্তে পারি নে মোহ!
ভালোবাসা মোর রাখি নি কাঁটায় ঘিরে,
সুলভ প্রেমের দুর্দশা তাই কিরে!
গোলাপের মত কণ্টকী নই শুধু,
তাই কি এ বুক জমে না গোলাপী মধু!

আফিমের ফুল

আমি বিপদের রক্ত নিশান
আমি বিষ-বুদ্বুদ,
আমি মাতালের রক্ত চক্ষু,
ধ্বংসের আমি দূত।
আমার পিছনে মৃত্যু-জড়িমা
আফিমের মত কালো,
বিধির বিধানে যেথা সেথা তবু
সুখে থাকি, থাকি ভালো!
কমল গোলাপ যতনের ধন
অল্পে মরিয়া যায়,
আমি টিকে থাকি মেলি' রাঙা আঁখি
হেলায় কি শ্রদ্ধায়!
গোখুরা সাপের মাথায় যে আছে
সে এই আফিম ফুল,
পদ্ম বলিয়া অজ্ঞ জনেরা
ক'রে থাকে তারে ভুল!
না ডাকিতে আমি নিজে দেখা দিই
রাঙা উষ্ণীব প'রে,
বিস্মৃতি-কালো আতর আমার
বিকায় সে ভরি দরে!
গোলাপ কিসের গৌরব করে?
আমার কাছে সে ফিকে;
আমি যে রসের করেছি আধান
জীবন তাহে না টিকে!

BANGLADARSHAN.COM

গান

কাঁটা বনে কেন আসিস্ জোনাকী—
অন্ধকারে?
বুঝি এ নিশায় প্রাণ দিতে, হয়,
হয় তোমারে!
ফুল তো হেথায় হাসে না,
ভুলেও ভ্রমর আসে না,
শুধু কাঁটা এ যে আগাগোড়া ভিজে
অশ্রুধারে!

BANGLADARSHAN.COM

স্রোতের ফুল

জীবন কুস্বপন—জনম ভুল!
চলেছি ভেসে ভেসে স্রোতের ফুল
যুঝি মরণ সনে,—
মরিতে ক্ষণে ক্ষণে,
না পাই তল কিবা না পাই কূল!

অভিমানের আয়ু

যখনি বেদনা পাই ভাবি দূরে চলে যাই

উঁচু করি' মানের নিশান,-

মমতা চোখের জলে ধুয়ে মুছে যাক চ'লে

একেবারে হ'ক অবসান।

বেলা না পড়িতে হয় রাগ তবু পড়ে যায়

ব্যাকুল হইয়া ওঠে প্রাণ,

ব্যথা-সচকিত মনে সে বুঝি নিমেষ গণে,

এখনো কি রাখা যায় মান!

BANGLADARSHAN.COM

বাসি ও তাজা

হায়, নিশি শেষের মলিন ফুলহার!

ধূলায় ফেলে গেল চলে

কণ্ঠে ছিলে যার!

ছিল ডোরে ফুলের রাশি

সবাই কিছু হয়নি বাসি,

সবাই তবু সমান হ'ল

ধূলায় একাকার!

সবাই তবু ক্ষুণ্ণ মনে

রইল চেয়ে অকারণে,

কেউ নিলে না, ঠাই দিলে না

বক্ষে আপনার!

গন্ধ কাঁদে পুষ্পপুটে,

শুভ্র হাসি ধূলায় লুটে,

মরমী কেউ নাই রে ধরায়,

বিফল হাহাকার।

BANGLADARSHAN.COM

গান

বঁধু আমার শুধু তুমি
নয়ন তুলে চাও;
তোমার মধুর দৃষ্টি, আমার
দৃষ্টিতে মিলাও!
সোহাগ, হাসি, মধুর বাণী,
ভাগ্যে আমার নাই সে, জানি;
আঁখির সাথে আঁখির মিলন
ঘটবে না কি তাও!

BANGLADARSHAN.COM

জলের আল্পনা

জলে ঐঁকেছিলাম ছবি—
লুকাল সে এক নিমেষে;
নয়ন-জলে ঐঁকেছি যায়
সে ছবি হয় লুকায় কিসে!

গান

কারো আঁখি তুলে চাইবারো, আর,
নাইক অবসর!

কারো চক্ষে পলক পড়ে না, হয়,
দৃষ্টি-সে কাতর!

কেউ চিন্তে নাহি চায়

কেউ ভুলতে নারে, হয়,

কেউ নূতন পাড়ি জমায়, কারো
নাই কোনো নির্ভর

BANGLADARSHAN.COM

ভগ্নহৃদয়

একজনে ভুলেছে যখন

আরেক জনেও ভুলবে গো!

চিতার কালি ডুবিয়ে দিয়ে

সবুজ তৃণ দুর্লবে গো!

নগ্ন বনে শীতের শেষে

ফাগুন ফিরে আসবে হেসে,

সবুজ শাখে অবুঝ পাখী

নূতন ধ্বনি তুলবে গো!

কালিন্দী আর গঙ্গাধারা

দীর্ঘ পথের সঙ্গী তারা,-

ভুলবে তারাও পরস্পরে

যুক্তবেণী খুলবে গো!

পুরানো প্রেম

ভুল্বে ভেবে ভুল করেছি,

ভোলা অত সহজ নয়;

অনেক দিনের অনেক দুখের

ভালোবাসায় অনেক সয়!

পরশখানি বুকের কাছে

এখনো হয় জড়িয়ে আছে,

ছড়িয়ে আছে সবার মাঝে,

জড়িয়ে আছে জগৎময়!

হাসি খেলায় চোখের জলে

জড়িয়ে আছে নানান্ ছলে,

শুনলে পরে মধুর স্বরে

হঠাৎ মনে তারেই হয়!

জড়িয়ে আছে ফুল তোলাতে,—

শ্রাবণ নিশির হিন্দোলাতে,

তন্দ্রাময়ী জ্যোৎস্না সাথে

স্বপ্নে এসে কথা কয়!

BANGLADARSHAN.COM

গান

আহা কারে দেখে আঁখিতে আর
পলক পড়ে না?
সে তো চলে গেল চেয়েই,—যেন
নাহিক চেনা!
বাধা পেয়ে মনের কথা
রয়ে গেল মনেই গাঁথা,
অভিমাণে অন্ধ হিয়া,
অশ্রু বারে না!

BANGLADARSHAN.COM

মধু ও মদিরা

বাস্তিত্ব ধন পেলেনা? তবু তো
সঙ্গী পেয়েছ, হয়!
মধু মিলিল না? পাত্র তোমার
ভরি' লহ মদিরায়!
ব্যথার চিহ্ন দিয়োনা লাগিতে,
অশ্রু নিবারো উতরোল গীতে,
অধরের হাসি নয়নের আলো
নিবিয়া যেন না যায়।
থাক তুমি থাক চিরদিন সুখে,
থাক কৌতুক-বিকশিত মুখে,
গরল ভাখিয়া পাগল কে হ'ল
কি ফল ভাবিয়া তায়।

প্রেম-ভাগ্য

ভালোবেসে কাছে গিয়ে ফিরেছি' ব্যথা নিয়ে
অশ্রুভারে কেঁপেছে নয়ন,
শুকায়ে উঠেছে হাসি শুকায়েছে পুষ্পরাশি
বাসি হ'য়ে গিয়েছিস, মন!
অকালে দিয়েছে দেখা ভালে দুর্ভাবনা-লেখা,
মন তুই হয়েছিস বুড়া,
আর পাগলের প্রায় ফিরিস্ নে পায় পায়,
নিরালায় জুড়া তুই জুড়া।
ভালো যারা বাসিবার বাসুক বাসুক, আর
ভালোবাসা-পেয়ে খুসী হোক,
ভাঙা তরী বেয়ে বেয়ে তাদের পিছনে ধেয়ে
তুই মিছে রাঙাস নে চোখ।
ব্যথা পেয়ে অভিমানে ব্যথা তুই কারো প্রাণে
দিসনে রে ফেলিস্ নে শ্বাস,
কিবা উন্মাদের মত ওরে চির প্রেম-ব্রত!
করিসনে প্রেমে পরিহাস।
চলে আয় চলে আয় পায়ে কাঁটা দলে আয়
কোলাহল ছেড়ে একা বোস,
ভালোবাসা-ভাগ্য নিয়া যারা ফেরে এ দুনিয়া
তুই রে তাদের কেউ নোস্।
যে ফিরেছে দেশে দেশে আজীবন ভেসে ভেসে
অতলের কোলে তার ঘর,
ছল ছল আঁখি যার পরাণ সরস তার
তার কাছে মরণ সুন্দর।

প্রেমের প্রতিষ্ঠা

তবে রচনা কর
ওই গগন পর'
হায় প্রেমের লাগি'
পাত আসন, ও!
যদি ধরণী 'পরে
প্রেমে ম্লানিমা ধরে
যদি বিরূপ আঁখি
করে শাসন, ও!
যদি সাধের মালা
ফেলে চলিয়া যায়,
প্রেম ভুলিয়া যায়,—
যদি বাহুর পাশ
মানে রাহুর গ্রাস
যদি কঠিন ফাঁস,
আঁখির দিঠি
আঁখি সলিলে ছায়,—
তবে ফিরাও আঁখি
হায় ব্যথিত পাখী
তুমি ফির একাকী,
ওই নীল পাথারে
দাও নিবেদিয়া, রে!
ওই ব্যাকুল হিয়া
কল— ভাষণ, ও!

BANGLADARSHAN.COM

গান

হায় ভালোবাসার আলয় সে যে
চির স্বপনে!
আমি বাঁধিতে তায় চেয়েছিলাম
জীবন-পণে।
সে সুখের বুকু কেঁদে উঠে
দুখের পায়ে পড়ল লুটে,
জ্যেৎস্না-রাতে এসে, মিশে
গেল তপনে!

BANGLADARSHAN.COM

তোড়া

দুধের মত, মধুর মত, মদের মত ফুলে
বঁধেছিলাম তোড়া,
বৃন্তগুলি জরির সূতায় মোড়া!
পরশ কারো লাগলে পরে পাপড়ি পড়ে খুলে,-
তবুও আগাগোড়া;-
চৌকী দিতে পারলে না চোখ জোড়া;
দুধের বরণ, মধুর বরণ, মদের বরণ ফুলে
বঁধেছিলাম তোড়া!

মধুর মত, দুধের মত, মদের মত সুরে
গেয়েছিলাম গান,
প্রাণের গভীর ছন্দে বেপমান!

হাক্কা হাসির লাগলে হাওয়া যায় সে ভেঙেচুরে,
তবুও কেন প্রাণ
ছড়িয়ে দিলে গোপন মধু তান!

মধুর মত, মদের মত, দুধের মত সুরে
গেয়েছিলাম গান।

মধুর মত, মদের মত অধীর করা রূপ
বেসেছিলাম ভালো,
অরুণ অধর, ভ্রমর আঁখি কালো!

নিশাসখানি পড়লে জোরে হ'তাম গো নিশ্চুপ,-
সে প্রেমও ফুরাল!

নিবে গেল নিমেষহারা আলো!
মধুর মত, মদের মত, অধীর-করা রূপ
বেসেছিলাম ভালো।

একের অভাব

পুরাণো মোর মরম-বীণায়

একটি তার আর বাজেনা রে;

একটি তারের নীরবতায়

বিকল করে সকল তারে!

যে সুর বাজাই বেসুর লাগে,

কোথায় যেন কসুর থাকে;

জমে না হয় গান খেমে যায়

পরাণ-ভরা হাহাকারে।

BANGLADARSHAN.COM

বর্ষ-বিদায়

আমের মুকুল ঝরিয়া আজিকে মিশিছে নিমের ফুলে,
ম্লান হাসিটুকু কাঁপিছে অধরে অশ্রু আঁখির কূলে!

প্রাণ করে হয় হয়,
বরষের পথ সঙ্গে যে ছিল সে আজ চলিয়া যায়।

কত না তারার খণ্ড-জোছনা কত স্নেহ, কত প্রীতি,
কত দ্রুণ আঁখি চেয়ে আছে কত তিক্ত-মধুর স্মৃতি;

কত আশা কত ভয়
কতই গরব, কত সে কুণ্ঠা, – ফুল-কণ্টকময়।

বকুল ঝরিয়া যায় গো মরিয়া পিছনে কিছুর না রাখি’,
সারা যামিনীর সাথে যে প্রদীপ স্তিমিত তাহার আঁখি;

বুক ভরে হাহাকারে,
লুতার লালায় লিগু কুঁড়িটি পাপড়ি মেলিতে নারে।
কিশোর আশার কিশলয় ভেঙে স্মৃতি আজ বাঁধে নীড়,
দুর্বল মনে সংশয় আর দুর্ভাবনার ভিড়;

ব্যসন কলহ, ক্লেশ
ব্যথিকে আজিকে সারা বরষের বিষ-ভরা বিদেহ।

অঞ্জলি করি’ সুন্দরী উষা যে সোনা গেছিল ঢালি’
নিশীথের কালো নিকষে কষিতে সকলি কি হ’ল কালি?

জগতের আনাগোনা
সে কি হ’ল শেষে অশ্রুজলের মত আগাগোড়া লোণা?

অতসী-অশোক গাঁথিতে কি হয় গৈথেছি অপরাজিতা?
প্রাণের স্ফটিক পাত্রে ঢেলেছি মিঠার সঙ্গে তিতা?

বিশ্ব কি বিশ্বাদ
একি ভুল নয়? – এই বিষময় মোহময় অবসাদ?

ঝরা ফুল পাতা মাটি হ’য়ে যায় জাগে তায় অক্ষুর,
মৃত্যু প্রবল করে উজ্জ্বল জীবনের ক্ষীণ সুর।

ওরে নাই নাই শোক,
ত্যজিছে আবার অনন্ত তার বরষের নির্মোক।

ঘণ্টা পড়েছে নাট্যশালায় নূতন পর্দা উঠে!
নব নব নীড় উঠিছে গড়িয়া শামুকের দেহ-পুটে!

পুরাতন অবসান,
তারার কিরণ-সঙ্গমে ফিরে আজিকে পুণ্য স্নান!

নব-জীবনের বিদ্যুৎ-সে যে বেদনার বুকে খেলে,
শিকড় কাটিতে ডর নাহি যার সফলতা তারি মেলে।

মরণ মরণ নয়,
জীবন-শিখার গোপন আধারে ক্ষয়হীন সঞ্চয়।

নিমফুল আর আমের মুকুল চুমে আজ ধূলিকণা,
তিক্ত আভাসে বক্ষে ধরিছে মধুর সম্ভাবনা;

পুরাণো চলিয়া যায়,
অশ্রু-সজল মৌন পরাণ নূতনের পথ চায়।

BANGLADARSHAN.COM

বর্ষ-বরণ

এস তুমি এস নূতন অতিথি!
উষার রতন প্রদীপ জ্বলি’;
রৌদ্র এখনো হয়নি অসহ
এখনো তাতেনি পথের বালি।
মধু যামিনীর মোতিহার ছিঁড়ে
ছড়ায় পড়েছে মহয়া ফুল,
তোতার তুতিয়া রঙের নেশায়
বনভূমি আজ কী মশ্গুল!
রেশ্মী সবুজে সাজে দেবদারু
পশ্মী সবুজে রসাল সাজে,
আবৃত ধরার কিশোর-গরব
সবুজের মখমলের মাঝে।
কত ফুল আজি পড়িছে ঝরিয়া,—
পড়ুক ঝরিয়া নাহিক ক্ষতি;
হাল্কা হাওয়ার দিন সে ফুরাল,
উদিল জীবনে তপের জ্যোতি।
বসন্ত আজ মাগে অবসর
যৌবন-শোভা পড়িছে ঝরি’;
চির-নবীনের ওগো নবদূত!
তোমাতে আজিকে বরণ করি।
এস গো মৌন! মর্ত্য-ভবনে
নীরব চরণে এস গো চ’লে,
তন্দ্রা-তরল স্বচ্ছ আঁধার
উঠিছে দুলিয়া হাওয়ার দোলে।
ওগো পুরনারী ভরি’ হেমঝারি
চন্দন-বারি ঢালো গো ঢালো;
শিরীষ ফুলের পেলব কেশর
আকাশে বিছায় উষার আলো।
এস গো নূতন! রাজার মতন

এস আলোকের চতুর্দলে;
অশোকের ফুলে বুলে মধুকর
আমের কুঞ্জে কোকিল ভোলে।
আদি প্রভাতের প্রসন্ন প্রভা
পরাণে আবার বিলাও আনি',
ভূলায়ে দাও গো শোচন রোদন
পুরাণের পরে পর্দা টানি'!
বাসি স্বপনের কজ্জল-লেখা
হয়তো নয়নে রয়েছে লাগি',
তাম্বুল-রাগ রয়েছে অধরে,
সে ত্রুটির ক্ষমা নীরবে মাগি।
মঙ্গলারতি করিছে পাখীরা
চামেলি বরিষে লাজাঞ্জলি,
পুণ্যাহ! ফিরে এস গো জীবনে
প্রভায় ভুবন সমুজ্জলি'।
উঁচু সুরে বেঁধে তুলেছি সেতার
বাজাও তাহারে যেমন খুসী,
দীপকে, বাহারে, মেঘে, মল্লারে,
কখনো হাসিয়া কখনো রুগি'।
চন্দন-লেখা দ্বারে দ্বারে আজি
বন্দন-মালা দুলিছে বায়ে,
পেয়ারা-ফুলের রেশমী মিঠাই
ছড়িয়ে পড়িছে দখিণে বায়ে।
উৎসব-সুরে বাঁশী বাজে পুরে
অতিথি আনিয়ে এস হে তবে,
সাক্ষী দেবতা, তোমায় আমায়
সপ্তপদীর অধিক হ'বে।
রৌদ্র তখন রহিবে না মৃদু,
তাতিয়া উঠিবে পথের বালি,
তবু এস তুমি, অজানা পথিক!
আশার রতন প্রদীপ জ্বালি'।

BANGLADARSTIAN.COM

চম্পা

আমারে ফুটিতে হ'ল বসন্তের অস্তিম নিশ্বাসে,

বিষণ্ণ যখন বিশ্ব নির্মম গ্রীষ্মের পদানত;

রুদ্র তপস্যার বনে আধ ত্রাসে আধেক উল্লাসে,

একাকী আসিতে হ'ল-সাহসিকা অঙ্গরার মত

বনানী শোষণ-ক্লিষ্ট মর্মরি' উঠিল একবার,

বারেক বিমর্ষ কুঞ্জ শোনা গেল ক্লান্ত কুহস্বর;

জন্ম-যবনিকা-প্রান্তে মেলি' নব নেত্র সুকুমার

দেখিলাম জলস্থল,-শূন্য, শুষ্ক, বিহ্বল, জর্জর।

তবু এনু বাহিরিয়া,-বিশ্বাসের বৃত্তে বেপমান,-

চম্পা আমি,-খরতাপে আমি কভু বরিব না মরি;

উগ্র মদ্য সম রৌদ্র,-যার তেজে বিশ্ব মুহমান,-

বিধাতার আশীর্ব্বাদে আমি তা' সহজে পান করি।

ধীরে এনু বাহিরিয়া, উষার আতপ্ত কর ধরি';

মূর্ছে দেহ, মোহে মন,-মুহর্মুহ করি অনুভব!

সূর্যের বিভূতি তবু লাবণ্যে দিতেছে তনু ভরি';

দিনদেবে নমস্কার! আমি চম্পা! সূর্যেরি সৌরভ।

BANGLADARSHAN.COM

বকুল

বোঁটার বাঁধন অনায়াসে খুলি' সহজে ঝরি;
আমরা বকুল অতি ছোটো ফুল ধূলায় মরি!

আমরা হাসিনে ভুবন ভরিয়া রূপের জাঁকে,
সহজে মাটির মত হই, তবু গন্ধ থাকে।

রসের জোগান-বোঁটায় সে নাই বৃকেতে আছে,
তাই থাকে বাস জীবনে মরণে,-আগে ও পাছে।

কমল শুকালে সেও দ্যায় পীড়া ঘাসের বাসে,
আমরা শূকাই-ধূলা হই, তবু, গন্ধ ভাসে।

নিজে আছি পূরা নিজে মশ্গুল দিবস রাতি,
আমরা বকুল ছোটো ফুল,-নাই রূপের ভাতি।

BANGLADARSHAN.COM

আকন্দ ফুল

স্ফটিকের মত শুভ্র ছিলাম
আদিম পুষ্পবনে,
নীল হ'য়ে গেছি নীলকণ্ঠের
কণ্ঠ-আলিঙ্গনে!
বিশ্বাদের বিষ ভরিয়া পেয়েছি
গরলের নীল রুচি,
স্থাপুর ধেয়ানে পেলব এ তনু
হয়েছে পাথর-কুচি।
রুদ্র নিদাঘে খর বৈশাখে
রুদ্রেরি পূজা করি',
আধ-নিমীলিত পাপড়ি আমার
তুলুতুলু আঁখি স্মরি'।
নীলকণ্ঠের কণ্ঠ ঘিরিয়া
সর্পের আনাগোনা,—
আমি তারি সনে আছি একাসনে;—
পেয়েছি প্রসাদ-কণা।

BANGLADARSHAN.COM

শিরীষ

মাথার উপরে সূর্য জ্বলিছে
ঘিরিয়া রয়েছে তপ্ত হাওয়া,
কৃচ্ছ সাধন জীবন আমার
শান্তি কোথাও গেল না পাওয়া।
মৌমাছিটিকে দিতে পারি ছায়া
এমন আমার পাপড়ি নাই;
হায়! শিরীষের দৃঢ় বন্ধন!
সুলভ মরণ পাইনে চাই'।
আশার পাপড়ি মরমে মরিয়া
ফুটিল জীর্ণ কেশর রূপে,
মধুপানে এসে মৌমাছি শেষে
মূরছি' পড়িল ধুলির স্তূপে।
দুঃসহ দুখে কলিজা ছিঁড়িয়া
বাহিরায় যেন রক্ত নাড়ী,
পলক পড়ে না রক্ত আঁখিতে
তবু তো জীবন গেল না ছাড়ি'!
একি বেঁচে থাকা—এই কি জীবন?—
বুঝাতে বেদন নাহিক ভাষা;—
চিতার অনলে অরণ্য আরাম,
মরণের বুকে অ-মৃত আশা।

BANGLADARSHAN.COM

পুষ্পের নিবেদন

ওগো কালো মেঘ! বাতাসের বেগে
যেয়োনা, যেয়োনা, যেয়োনা ভেসে;
নয়ন-জুড়ানো মূর্তি তোমার,
আরতি তোমার সকল দেশে!
আকাশের পথে ক্ষণেক দাঁড়িয়ে
পিপাসা বাড়িয়ে যেয়োনা চ'লে,
গদ গদ ভাষে কি কহ?—আভাসে
পারি না বুঝিতে, যাও গো ব'লে!
কি বেদনা, মরি, গুমরি' গুমরি'
উঠিছে তোমার হৃদয়-দেশে?
তৃষিত ফুলের তৃষ্ণা জুড়াও
দাঁড়াও ভুবন-ভুলানো বেশে।
করণ তোমার কালো আঁখি হ'তে
দুটি ফোঁটা জল পড়িল ঝরে!—
ব্যথা পাও যদি, তবে, কেন যাও?
দাও গো মোদের পরাণ ভ'রে।
আঙুর-দোলানো অলকে তোমার
লেগেছে স্বপন-বুলানো হাওয়া,
হে চির-শরণ! জীবন-মরণ!
তোমার পানে যে যায় না চাওয়া!
হের পাণ্ডুর বনভূমি আজ
পাখীদের সুরে কত কাকুতি,
বজ্রের ভয় রাখেনা কেবল
কামিনী, কদম, কেতকী, যুথি!
ওগো কালো মেঘ! দাঁড়াও দাঁড়াও,—
বারেক দাঁড়াও যেয়োনা ভেসে,—
ধূলায় মলিন, পিপাসায় ক্ষীণ
দন্ধ-জীবন-দিনের শেষে।

BANGLADARSHAN.COM

কদম আবার উঠুক পুলকি',
কেতকী উঠুক কণ্টকিয়া,
কামিনীর শাখে যে স্বপন জাগে
তাহারে সফল করগো পিয়া।
গভীর তোমার কাজল নয়নে
ছলছলি' জল পড়িছে এসে,
তপ্ত বনানী ঢাকিছে তোমায়,—
দাঁড়াও ক্ষণেক ফুলের দেশে।

BANGLADARSHAN.COM

কালো

হায় সখী কালো ভালোবেসে ফেলেছি!
কালো যমুনারি জলে প্রাণ ঢেলেছি!
বিজুলি-জুড়ানো রূপে
আমি যে গিয়েছি ডুবে,
কালো আঁখি-তারা ল'য়ে আঁখি মেলেছি।

নব মেঘোদয়ে

কপোত! উড়িয়া যা রে শুভ্র পাখা মেলি'
প্রচ্ছায় মেঘের নীল ঘন পক্ষ-তলে,
ডুবে যা' মিশে যা' তুই সুখে কর কেলি
অস্থলিত পরিণত বৃষ্টি বিন্দু-দলে।
পাণ্ডুর তালের শ্রেণী হোক রোমাঞ্চিত,
ভয়ে পাংশু হোক ধরা; কিবা ক্ষতি তায়?
আছে যার উড়িবার সোয়াদ বিদিত
উড়িবে সে না ডরিয়া বজ্র-বেদনায়।
নয়ন জুড়ায়ে দেবে নব নীলাঞ্জন,
পাওয়া যাবে সারা দেহে চকিত পরশ;
শিহরি' বাদল হাওয়া দিবে আলিঙ্গন
অঙ্গে অঙ্গে সঞ্চরিয়া অমৃতের রস!
ভবন-বলভী-তলে এ হেন সময়ে
কে রহিবে সুপ্ত, হায়, নব-মেঘোদয়ে!

BANGLADARSHAN.COM

নব পুষ্পিতা

আহা! ওইখানে তুই থাকিস্! ও জুই

লুকাস্ নে খানিক!

তোর জ্যোৎস্না-হানা হাসিতে আজ

ফুটল কি মাণিক!

নূতন যেন দেখিস ধরা,—

বিনি-মদের নেশায় ভরা!

সাঁঝের কুঁড়ি! সৌরভে তোর

ভুবন অনিমিখ!

BANGLADARSHAN.COM

জুঁই

বরষার ধারা-যন্ত্র-ভবনে খুলেছে কল,
চল্ সখী মোরা তরণ এ তনু জুড়াই চল্।

শিথিল ক'রে দে সবুজ আঙিয়া, আজ বিকেলে,
কিসের সরম মেঘে ঘেরা এই রং মহালে?

আঁধার কানন আলো করি আয়, বন-জোসিনী!
আয় সুবাসিনী, আয় গো অমলা, সন্তোষিনী;

হৃদয়ের মধু-গন্ধ-গেহের খুলেছে চাবি,
ঘোমটা খুলিতে নয়ন মেলিতে আর কি ভাবি?

দুয়ারে দাঁড়ায়ে সঙ্কেত করে সন্ধ্যা-দূতী,
প্রাব্‌টের রং-মহাল-বাসিনী রূপসী যুথি!

হৃদয়ের মধু-গন্ধ-গেহের খুলে দে কল,
বরষার ধারা-যন্ত্র-ভবনে চল্ গো চল্!

BANGLADARSHAN.COM

কেলি কদম্ব

মেঘলা মেদুর আলো স্মৃতির ভুবনে,—
যেথায় কালিন্দী ধারা বয়ে যায় ধীরে,—
আমি ফুটি সেইখানে; সজল পবনে
প্রথম যে শান্তি-জল আমি ধরি শিরে।

আমারে ঘিরিয়া চির রাস-রসোল্লাস,
প্রতি রোম-কূপে মোর মিলন-মাধুরী;
সুষমা-সৌরভে মিল,—অপূর্ব বিকাশ,
কাঞ্চনে মণিতে মিল, লাভণ্যের রুরি!

পুলক-অঞ্চিত আমি জনমে জনমে,
স্মরণ-সরণী 'পরে, প্রাবৃটের পুবে!
মিশায়েছি গোরোচনা চন্দনে বিভ্রমে,—
মেখেছি ললাটে তাই—দেখেছি বন্ধুরে!
ওগো বন্ধু! ওগো মেঘ! শ্যামল! শীতল!
আমি চির আনন্দের অখণ্ড-মণ্ডল।

BANGLADARSHAN.COM

“পূরবৈএণ্ডা”

বহিছে পূরব হাওয়া পূরবী তানে!

ক্লান্ত আঁখিতে সুখ-তন্দ্রা আনে!

সাঁঝের স্বপন লাগে মেঘের রাশে,

আধ-সুখে ভরে বুক আধ-তরাসে!

গুরু গরজন,

ধারা বরষণ,

হরষে রসায় তরু-লতা-বিতানে!

BANGLADARSHAN.COM

শ্রাবণী

নব গৌরবে রজনীগন্ধা কুসুমদণ্ড তুলিল!

শাখায় শাখায় সুখ-সৌরভে নব কদম্ব দুলিল!

আকাশে বাতাসে সলিল-কণিকা নাচে গো,

কামিনী-যুথির উরসে মরণ যাচে গো;

বিল্লীমুখর পল্লীভবন, স্বপ্নভুবন খুলিল!

কামিনী ফুল

ক্ষণিক বরষণে সজল পরশনে
ফুটি গো বনে বনে কামিনী ফুল;
সাঁঝের অবসরে ক্ষণেক বায়ুভরে
দুলি গো শাখা ‘পরে দোদুল্ দুল্!

ক্ষণেকে যাই টুটি’ ধূলিতে লুটোপুটি,
অমল দল ক’টি ধরণী চুমে;
ক্ষণিক ফুল আমি টাঁকিনে দিন যামী,
নিমেষে ভরে আঁখি মরণ-ঘুমে।

ফুটি গো আঁখি জলে শ্মশান-ভূমি-তলে,
আঁখির ছলছলে ঝরি নিমেষে;
সমাধিতটে আসি’ উদাসী কাঁদি হাসি
বরষি সুধা রাশি স্মৃতির দেশে।

আমারি মত ফুটে নিমেষে যারা টুটে
তাদেরি সাথী হ’য়ে রয়েছি একা;
সুরভি আঁখিজল, –ঝরি গো অবিরল, –
স্মরণ-সুমধুর –মমতা-লেখা!

BANGLADARSHAN.COM

সুখ-বেদনা

কেন ফুলের মুখে হাসি দেখে
মেঘের চোখে এল জল?
কোন্ কথা তার জাগছে মনে?
বল্ তো তোরা আমায় বল্!
সত্যি কি গো সুখের ব্যথা
জাগায় প্রাণে বিহ্বলতা?
তবে সে কি নয় কো শুধুই
কাব্য-কথা-কথার ছল!

BANGLADARSHAN.COM

কেতকী

অর্ঘ্য লয়ে যুক্ত করে উর্দ্ধ মুখে আছি প্রতীক্ষায়,
আমারে সার্থক কর, ওগো প্রিয় মৌন-মনোহর!
কণ্টকী কেতকী আমি, ফুটেছি কাঁটার বনে, হায়,
তবুও করুণা তুমি কর মোরে ভীষণ-সুন্দর!

ফুটেছি কাঁটার বনে সাপের শাসনে করি বাস,
অজস্র অশ্রুর মাঝে দিনে দিনে হয়েছি লালিত;
চৌদিকে শ্বসিয়া উঠে ভুজঙ্গের গরল নিশ্বাস,
সদা সশঙ্কিত প্রাণ, স্পন্দমান, নেত্র মুকুলিত।

সুচির সন্ধ্যার ঘেরা দৃষ্টিহারা ম্লান মহীতলে,
তোমারি ধৈর্যে থাকি গন্ধভরা তন্দ্রাধূপ ধরি';
মেঘের পরাগ ঝরে, ঝিঝি ডাকে, জোনাকী সে জ্বলে,

কুণ্ঠিত এ প্রাণ মোর রসের রভসে ওঠে ভরি'।

সুরভি সুষমা আর কাঁটা লয়ে জন্মেছি জগতে,
পেলব-পরুষ আমি, অবিদিত নহে সে তোমার,
তবুও সার্থক করি' লও ওগো লও কোনোমতে
কণ্টকের কুণ্ঠা সনে সৌরভের গৌরব আমার।

BANGLADARSHAN.COM

দুধে-আলতা

এই দুধ-পাথরের বুকে রাখ
রক্ত-কমল পা' দুটি,
এস দুধ-পাথারের লক্ষ্মী! এস
ক্ষীর সাগরের পদ্মটি!
এস মূর্তি ধ'রে নয়ন 'পরে
আশৈশবের কল্পনা!
এই শূন্য ঘরে পড়ুক আজি
আলতা-পায়ের আল্পনা!
ওগো পাথরের এই ঠুনকো থালায়
চরণ রাখ, নেইক ডর;
এই নিটোল পাথর অটল আদর
ঠুনকো হ'লেও সইবে ভর!
যারে বইতে কভু হয়নি ক' ভার
তোমার ভার সে বইবে গো,
এই ইচ্ছা-সুখের হালকা বোঝা
অনায়াসেই সইবে গো!
দুধে ভিজিয়ে তোলো ঘুঙুরগুলি
পাঁয়জোরে জোর বলবে না,
ওগো নইলে পরে দশের ঘরে
মিলন-আশা ফলবে না!
তুমি ভরা ঘটের ভার নিয়েছ,
আমের কচি ডাল তাতে,
ওগো বিধির বরে নূতন ঘরে
মিলাও দুধে আলতাতে!

BANGLADARSHAN.COM

কিশোরী

তার জলচুড়িটির স্বপন দেখে
অলস হাওয়ায় দীঘির জল,
তার আলতা-পরা পায়ের লোভে
কৃষ্ণচূড়া ঝরায় দল!
করমচা-ডাল আঁচল ধরে,
ভোমরা তারে পাগল করে,
মাছ-রাঙা চায় শীকার ভুলে,
কুহরে পিক অনর্গল;
তার গঙ্গাজলী ডুরের ডোরা
বুকে আঁকে দীঘির জল।
তারে আস্তে দেখে ঘাটের পথে
শিউলি ঝরে লাখে লাখে,
জুয়ের বুকে নিবিড় সুখে
প্রজাপতি কাঁপতে থাকে!
জলের কোলে ঝোপের তলে
কাঁচপোকা রং আলোক জ্বলে,
লুক্ক ক'রে মুঞ্চ ক'রে
বৌ-কথা কও কেবল ডাকে;
আর হাল্কা বোঁটা ফুলের বুকে
প্রজাপতি কাঁপতে থাকে।
তার সীঁথায় রাঙা সিঁদূর দেখে
রাঙা হ'ল রঙন ফুল,
তার সিঁদূর টিপে খয়ের টিপে
কুঁচের শাখে জাগল ভুল!
নীলাম্বরীর বাহার দেখে
রঙের ভিয়ান্ লাগল মেঘে,
কানে জোড়া দুল্ দেখে তার
ঝুম্কো-জবা দোলায় দুল;

BANGLADARSHAN.COM

তার সরু সীঁথার সিঁদূর মেখে
রাঙা হ'ল রঙন ফুল!

সে যে ঘাটে ঘট ভাসায় নিতি
অঙ্গ ধুয়ে সাঁঝের আগে,
সেথা পূর্ণিমা চাঁদ ডুব দিয়ে নায়,
চাঁদ-মালা তায় ভাসতে থাকে!
জলের তলে খবর পেয়ে
বেরিয়ে আসে মৃগাল মেয়ে,
কল্মী-লতা বাড়ায় বাহু
বাহুর পাশে বাঁধতে তাকে;

তার রূপের স্মৃতি জড়িয়ে বুকে
চাঁদের আলো ভাসতে থাকে!

সে ধূপের ধোঁয়ায় চুলটি শুকায়,
বিনিসূতার হার সে গড়ে,
দোলন চাঁপার নীর গায়ে
আলোর সোহাগ গড়িয়ে পড়ে!
কানড়া ছাঁদ খোঁপা বাঁধে,
পিঠ-ঝাঁপা তার লুটায় কাঁধে,

তার কাজল দিতে চক্ষে আজো
চোখের পাতায় শিশির নড়ে;

সে বেণীতে দেয় বকুল মালা
বিনিসূতার হার সে গড়ে।

সে নামালে চোখ আকাশ ভরা
দিনের আলো ঝিমিয়ে আসে

সে কাঁদলে পরে মুক্তা বারে
হাসলে পরে মাণিক হাসে!
কেরল মাঠের নৌকাখানি
জানে নাক' তুফান পানি,-

কুল্কুলিয়ে চেউগুলি যায়
নুইয়ে মাথা আশে পাশে

যদি সঁউতি ‘পরে চরণ পড়ে
হয় সে সোনা অনায়াসে!

ওই সওদাগরের বোঝাই ডিঙা
ফিঙার মত চলত উড়ে,
তার পরশ-লোভে আজকে সে হয়,
দাঁড়িয়ে আছে ঘাটটি জুড়ে!
অরাজকের পাগ্লা হাতী
পথে পথে ফির্ছে মাতি,’-
তারে দেখতে পেলেই করবে রাণী
গুঁড়ে তুলে তুলবে মুড়ে!
ওগো তারি লাগি বাজছে বাঁশী
পরাণ ব্যেপে ভুবন জুড়ে!

BANGLADARSHAN.COM

সুধা

সুধা আছে গো কোথা?
কেবা জানে বারতা?
আছে কোন্ সুদূরে—
কোন্ স্বরগ-পুরে!

হায় কোন্ নিঝরে
সুধা নিয়ত ঝরে?
সে কি হরে গো ক্ষুধা—
সেই স্বরগ-সুধা!

সে কি পিপাসা হরে?
সেকি অমর করে?
হায়! তাহারি তরে
মন কাঁদিয়া মরে।
আমি শুনেছিঁনু রে
সুধা আছে সুদূরে
কোন্ স্বরগ-পুরে,
তাই মরেছিঁ ঘুরে।

ঘুরে মরেছিঁ একা,
তবু পাই নি দেখা!
শেষে তোমারে পেয়ে
প্রাণ উঠিল গেয়ে!

করি' তোমারে সাথী
চোখে জাগিল ভাতি!
মোর টুটিল রাতি
মন উঠিল মাতি'।

সুধা ছিল নিঝুমে,—
বুঝি মগন ঘুমে,—

BANGLADARSHAN.COM

তব প্রথম চুমে
এল মরত-ভূমে!

ক্ষুধা নিল সে হরি'
দিল অমর করি'
সুধা পড়িল ঝরি'
এই ভুবন 'পরি!

সে যে নিকটে আছে,-
আছে তোমারি কাছে,-
আগে জানি নি তাহা,
ঘুরে মরেছি আহা!

সুধা স্বরগে আছে
আছে তোমার কাছে;
তবে, স্বরগ-ভূমি
সে কি! তুমি গো তুমি।

সুধা অধরে রহে,
শুধু স্বরগে নহে,
তাই জগত বাঁচে,
মোর হৃদয় নাচে!

সুধা আছে তোমাতে,
আছে মিলন-রাতে;
সুধা প্রথম চুমে
নেমে এসেছে ভূমে।

আমি জানি ভারতা,
আমি জানি সে কথা,
চির- নীরব স্রোতে
সুধা বহে মরতে।

তাই শিশুরা হাসে
চাঁদ হাসে আকাশে,

BANGLADARSHAN.COM

তাই ফাগুন আসে
ফিরে বনের পাশে!
সুধা মিঠার মিঠা!
ফুল— মধুর ছিটা!
সুধা পরাণ ভরে,
সুধা নিঝরে ঝরে!
সুধা হরে অবসাদ,
হরে সকল বিষাদ;
সুধা দেবতার সাধ,
সুধা অগাধ! অগাধ!

BANGLADARSHAN.COM

গান

আমার যাহা ছিল আপন ব'লে,
আনিয়া দিয়াছি ও চরণতলে।
এ তনু মন ভরি'
এবে বিহরে, মরি,
তোমারি সৌরভ শতেক ছলে!

কৃষ্ণকেলি

পরীর ছেলেরা বিনিসূতে যবে ওড়ায় ফড়িং-ঘুড়ি
দুপুরের সেই আলোকের পুবে আমরা অফুট কুঁড়ি;
সন্ধ্যার হাওয়া বহিলে ভুবনে তবে সে ঘামটা খুলি,
আঙিনার কোলে ভাঁজে ভাঁজে খোলে রঙীন পাপড়িগুলি!

আমরা কৃষ্ণকেলি,

কাহারো পরনে জর্দা তসর কাহারো বা রাঙা চেলি!

আকাশ-বাহিনী মন্দাকিনীর সোনার কিনার জুড়ি'
পরীর মেয়েরা মিলিয়া গুঁড়ায় পঞ্চ বরণ গুঁড়ি;
সোনার পইঠা 'পরে বসি' তারা প্রজাপতি ব্রত ক'রে
পঞ্চবরণ মাখায় যখন প্রজাপতি ধ'রে ধ'রে;—

তখন নয়ন মেলি,

পঞ্চবরণ ঘাঘরিতে সাজি কিশোরী কৃষ্ণকেলি।

চাঁদ হেন বর আসে গো যখন শাঁখ বাজে ঘরে ঘরে,
সন্ধ্যা বালিকা কপালে কপোলে ক'নে-চন্দন পরে,
সবুজ ডুলিতে আসি মোরা সবে বর বরণের লাগি'
এয়োর কর্ম আমরাই করি আমরা বাসর জাগি!

আমরা কৃষ্ণকেলি,

সন্ধ্যামণির সঙ্গিনী মোরা আঁধারে নয়ন মেলি।

BANGLADARSHAN.COM

পুষ্প-মেঘ

ওগো শরতের শুরু শশী!
কোন্ দেশে আজি দৃষ্টি তোমার
কি ভাবো না জানি একেলা বসি’!
তোমার অমল অমেয় অমিয়া
মেঘ-মল্লিকা হ’তেছে জমিয়া,
আমি চেয়ে আছি,—অমৃত-খণ্ড
ভূতলে কখন পড়িবে খসি!
দূরে দূরে তারা স্বপনে মিলায়,—
কত ভঙ্গীতে, ছন্দে লীলায়!
নিশিদিশি তারা দেশে দেশে বুঝি
মন্দার-কলি যায় বরষি’!
ওগো নিশীথের মৌন শশী!

BANGLADARSHAN.COM

শরতের প্রতি

হৃদয়-জয়ের বাজিয়ে বাঁশী
দিগ্বিজয়ী! কোথায় যাও?
দাঁড়াও, তোমায় দেখি খানিক,
নয় তো আমায় সঙ্গে নাও!
ডাক দিয়েছ একেবারে
সকল ঘরের দ্বারে দ্বারে,
কুবের-পুরীর সোনার রাশি
দ্বারে দ্বারেই লুটিয়ে দাও!
আর্দ্র মেঘের স্নিগ্ধ কোলে
বিদ্যুতে ঘুম পাড়াও ছলে,
সোনার তুলি বুলিয়ে ধানে
চেউয়ের তানে দুলিয়ে যাও!
পদ্মফুলের মধ্যখানে
হঠাৎ হ'লে মগন ধ্যানে,
কুড়িয়ে পেয়ে পরশ মণি বিলিয়ে দিলে হয় গো তাও!
দিগ্বধূরা তোমার তরে
চন্দ্রালোকের চাঁদোয়া ধরে,
কাশের কুসুম হেলায় চামর
বন্ধু! হেথায় বারেক চাও।

BANGLADARSHAN.COM

পদ্মের প্রতি

যখন প্রথম প্রভাত-রবি

দৃষ্টি হানে তোমার 'পরে,

বল দেখি কমল! তোমার

প্রাণের ভিতর কেমন করে?

সকল মধু-গন্ধ-হাসি

প্রাণের অফুট স্বপন রাশি

ফুটতে গিয়ে একেবারে

ওঠে না কি অশ্রু ভ'রে?

আমি আপন হৃদয় দিয়া

বুঝতে পারি তোমার হিয়া,-

বুঝতে পারি আলোয় প্রেমে

কমল হৃদয় জীয়ে মরে।

BANGLADARSHAN.COM

লীলাকমল

মুক্তিকা সাথে বাঁধা আছি আমি
জলেরো সঙ্গে আছি,
তবু আলোকের মুক্তি-লোকেতে
পৌঁছিয়া যেন বাঁচি!
মৃগালের ক্ষীর সম্বল করি'
সলিল ফুঁড়িয়া উঠি,-
নিশ্বাস রুধি' দীর্ঘ যামিনী
কঠিন করিয়া মুঠি।
অরুণের মৃদু পাণির পরশে
পরাণ ভরিয়া ওঠে,
শিশিলিয়া মুঠি আলোকের দান
শতদল হ'য়ে ফোটে!
ধ্যানের দেবতা প্রাণে আসে মোর
ধারণায় মিশে ধ্যান,
অনুভবে জানি পাঠায়েছে রবি
আলোর অভিজ্ঞান!
উষারাগী আসি আলতা পরায়
ডালিমের রাঙা রসে,
শফরী লীলায় সমীর প্রবাহ
শরীরে পরাণে পশে!
সবুজ টগর টোপা পানা গুলি
দীঘির বুকেতে সাজে,
হিল্লোল-তালে সলিল-আলয়ে
হিন্দোল রাগ বাজে!
ঢেলে যায় রবি ধ্যানের সুরভি
গভীর এ মম মনে,-
অসেচ হরষ অমূর্ত রস
আলোর আলিঙ্গনে।

BANGLADARSHAN.COM

অতি অদ্ভুত মৃদু বিদ্যুৎ

উঠে মুহূ রণরণি'

হৃদয়ে চরণ রাখেন দেবতা,-

পদ্মের মাঝে মণি!

তার পরে ধীরে আকাশ মুকুরে

আলো হ'য়ে আসে আলা,

ঝরে যায় দল, জীবনের শুধু

অবশেষ জপমালা।

ভকতি-সাধন আমি গো তখন

পুষ্পের মহারাণী,

প্রেমিকের লীলাকমল, মরাল-

মধুপের রাজধানী।

মাটির সঙ্গে বাঁধা আছি আমি

আছি গো জলের সাথে,

তবু আলোকের অভিসারে, করি

যাত্রা তিমির রাতে!

BANGLADARSHIAN.COM

কুমুদ

চাঁদের চুমায় জাগিয়া উঠেছি
বিথারি' অমল ছত্র,
আমি কুমুদিনী নৈশ-বাতাসে
খুলেছি সুরভি-সত্র!
অন্ধ ভ্রমর বন্ধ রয়েছে
মুদিত কমল-বক্ষে,
জোনাকী আমার বন্ধু এসেছে
জোছনা আহরি' পক্ষে!
গোপন করেছে প্রাচীন রোহিত
তার হরিহর মূর্তি,
আলোক-লিপ্ত লহরে এখন
জাগে শফরীর স্ফূর্তি!
কূলে দেউলের অঙ্গে লেগেছে
সময়ের মসী চিহ্ন,
আমার বঁধুর অমল পরশে
সে মসী ছিন্ন ভিন্ন!
চির-দক্ষিণ নায়ক-আমার
মরম বুঝিতে দক্ষ;
সুষমা যে শোষে দস্যুর মত
কে চাহে তাহার সখ্য!
সূর্য্যে আমি দূর হ'তে নমি,
ভালবাসি আমি ইন্দু,
লক্ষ যোজন দূরে থেকে মোরে
দেছে সে অমৃত বিন্দু।

BANGLADARSHAN.COM

গান

শেফালি গো! সন্ধ্যা গেলো,
 মুকুল ফুটাও!
সুরভি ছিটাও পবনে উঠাও—
 ভুবনে ছুটাও!
 মুকুল ফুটাও!
আঁধার গলে জ্যোৎস্না-জলে;
 তুমিও গলাও—
হাওয়ারে,—তুলাও! তন্দ্রা বুলাও।
 পরাগ ভুলাও!
 গন্ধ বিলাও!
গন্ধ লুকাও, আবার লুটাও
 গন্ধ ছুটাও!
 মুকুল ফুটাও!

BANGLADARSHAN.COM

শেফালি

যখন তিমিরে ভাঁটা পড়ে আসে জেগে জেগে ওঠে ডাঙা,
উষার ছবিটি বুকে ধরি' যবে মেঘের মুকুর রাঙা;
সুপ্ত শিশুর হাসি সম যবে প্রভাতের সরোবরে
প্রথম-আলোক-পরশ-পুলকে মৃদু লেখা সঞ্চরে,

তখনি আমরা ঝরি,-

শরতের নব শিশিরের সনে ঘন তৃণ বন 'পরি।

নামি গো নীরবে একে একে, যবে তারা ঝরে যায় নভে,
ভ'রে তুলি বন মৃদুল পবন সুকুমার সৌরভে।
থেকে থেকে মোরা ঝরে ঝরে পড়ি শরতের ফুলঝুরি
বিথারি' অমল ধবল পক্ষ, অরণ-বদন হুরী।

মোরা সবে ছোটো ছোটো

অরণ-পূর্ব অমল-প্রকাশ শারদ দিনের 'ফোটো'!

BANGLADARSHAN.COM

একটি স্থলপদের প্রতি

মেঘলা দিনের মলিন কমল!

অধরে তোমার একি গো হাসি!

জীবন-দিবার অবসানে বুঝি

খেয়ালে শুনেছ আশার বাঁশী!

রবি সে ডুবিল, উঠিল না,

তোমারি মাধুরী ফুটিল না,

সমুখে নিশার অন্ধ প্লাবন,

পিছনে মেঘের কালিমা-রাশি

ফুটিলে না তবু ঝরিবে

মুকুল-জীবনে মরিবে

অস্ত-খণের ক্ষণিক কিরণে

তবু মৃদু হাসি উঠিছে ভাসি!

একি আকুলতা! পুলকে

দুলিছে সাঁঝের আলোকে!

মেঘের নয়ন এল ছলছলি,

তবু তুমি একি হাসিছ হাসি!

BANGLADARSHAN.COM

নীলপদ্ম

আমি দেবতার অনিমেঘ আঁখি
জেগে আছি দিনযামী,
আমি কামনার নীল শতদল
মর্ত্তে এসেছি নামি'!
সৌরভে মম অকূল পাথারে
নাবিকেরা পায় দিশা,
সূর্য্য-পরাগ গর্ভে ধরেছি
আমি সুনিবিড় নিশা!
আমি চির শুভ, আমি চির ধ্রুব
চলৎ-লহর বুকুে,
আমি জগতের অন্তরাত্মা
রয়েছি ধেয়ান-সুখে!
সোনার সূতায় বাঁধিয়া রেখেছি
শ্যামল পাপড়ি গুলি,
সাগরে বসতি করি নিতি, তবু,
চেউয়ে চেউয়ে নাহি দুলি।

BANGLADARSHAN.COM

শতদল

আজিকে কেবল ওগো শতদল!

মৃদু হিল্লোলে দোলা,

দিকে দিকে দিকে পাপড়ি গুলিকে

একে একে একে খোলা।

থেমে গেছে ঝড় থেমেছে বাদল,

আকাশে না বাজে মেঘের মাদল

বাতাস মৃদুল শেফালি দোদুল

স্বপনে আপন-ভোলা!

ওগো শতদল আজিকে কেবল

হিল্লোল-ভরা দোলা।

সীস্ মহলের রূপসী দলের

ঘোমটা আজিকে খোলা!

মাথর উপরে তক্ তক্ করে

আকাশের পরকোলা!

দিকে দিকে ওড়ে গেরুয়া নিশান,

দিকে দিকে ওঠে গস্তীর গান

দিগ্বিজয়ীর যতগুলি তীরে

তূণীরে সে আজি তোলা;

সীস্ মহলের রূপসী দলের

অবগুণ্ঠন খোলা!

নাই আর আজি নীপে ভরা সাজি

ঝুলনের হিন্দোলা;-

মনের হরষে ডালিমের রসে

গোলাপী কাজল গোলা!

পেখম ধরেনা ময়ূর আজিকে

কোকিলের তান নাই দিকে দিকে,

উদাসীন প্রায় আছে নিরালায়

হতবাক্ হরবোলা;

BANGLADARSHAN.COM

নীপে ভরা সাজি নাই আর আজি,
নাই ঝুলনের দোলা।

ওগো শতদল! আজিকে কেবল
সব কোলাহল ভোলা,
রাঙা টুকটুক পাপড়ি ঝিনুক
নিভুতে ভরিয়া তোলা!
জ্যেৎস্না-মাখানো মরালের পাখা
আঁখি মেলে আজ তারি পানে তাকা,
বর্ষা চুকায়ে বিজুলি লুকায়ে
শাদা মেঘে চোখ বোলা;
(আজ) সীস্ মহলের সকল তলের
সকল ঝরোখা খোলা!

BANGLADARSHAN.COM

অবসান

আলো ফুরায়, কমল্ গো তোর আয়ু ফুরায়!
ব্রজের বাঁশী বাজে সে আজ কোন্ মথুরায়!
বলক ওঠে তপ্ত হাওয়ায়,
পলক নাহি চক্ষেতে, হয়!
ঝরা পাতায় ঘূর্ণা সে আজ তবু ঘুরায়!
আলো ফুরায়!

আবির্ভাব

যে আলোকে বাঁধন হরে
শিউলি ঝরে হেসে গো!
সেই আলো লেগেছে আজি
আমার প্রাণে এসে গো!
সরম-রাঙা বাঁধনগুলি
খসল রে তাই পড়ল খুলি',
কাঁদন আমার মিশিয়ে গেল
লুপ্ত হিমের দেশে গো!
আমার প্রাণের কোমল গন্ধ
ভিজিয়ে দিলে দিগদিগন্ত,
আভাস পেয়ে বিভাত বায়ু
বহিল ভালোবেসে গো!
ভরা দিনের বাজক বাঁশী,
ভরা সুখের ফুটল হাসি;
ভোলা স্বপন সফল হ'ল
সোনার শরৎ-শেষে গো!
যে আলোকে কাঁদন হরে
শিউলি মরে-হেসে গো!

BANGLADARSHAN.COM

তৃণ-মঞ্জরী

জগতের মাঝে অজানা অচেনা
চিরদিন মোরা আছি!
মধুকুপী আর পরথুপী আর
কান্সোনা, নীলমাছি!
আছি দেশ ভরি' তৃণমঞ্জরী
হরষের বুদ্ধবুদ্ধ,
ফুর্তির ফাউ-ফালতো আদায়,-
না-চাহিতে পাওয়া সুদ!
মোদের আদর জানিয়াছে শুধু
পাগল প্রেমিক কবি;
আমরা ধূলিরে করি পুলকিত
নম্র-মধুর ছবি।
মোরা সাধারণ, নাই আভরণ,
নাহিক আড়ম্বর,
রথের চাকায় প্রাণ দিই মোরা
পথের ধূলায় ঘর।

BANGLADARSHAN.COM

পারুল

সোনার কেশর, পাপড়ি সোনার, সোনার কলেবর,
পারুল! তোরে গড়েছে কোন্ ঢাকাই কারিগর?
সোনায় মাজা রংটি দেছে, দেছে শোভম ঠাম,
পারুলমণি! বল্ তো শুনি কারিগরের নাম!

ছেলেবেলার সখী যে তুই চাঁপা ফুলের বোন,
একটি কথা শোন্ গো আমার একটি কথা শোন্
নীরব কেন? করবে না রাগ ঢাকাই কারিগর,—
ঢাকা সে তো নাইকো পূরা,—জপছে চরাচর।

কানে কানে বল্তে কি দোষ? কেউ তো কোথাও নেই,
ঘুমিয়ে আছে চাঁপার গাছে সাতটি তোমার ভাই;
মুখখানি তোর কাঁচা সোনা—লাখ টাকা তার দাম;
পারুলমণি! বল্তো শুনি কারিগরের নাম।

BANGLADARSHAN.COM

অপরাজিতা

কালো ব'লে পাছে হেলা করে কেউ
তাই তো আমার পিতা
সকলের সেরা দিলেন আমারে
নামটি, –‘অপরাজিতা’!

আমি গুণহীন গন্ধবিহীন
ফুলের মধ্যে কালো,
পিতার আদরে আদরিণী, তবু,
আমিই কালোর আলো।

BANGLADARSHAN.COM

হেমন্তে

শাঁইয়ের গন্ধ থিতিয়ে আছে নিবিড় ঝোপের নীচে,
হেমন্তের এই হৈম আলো ঠেকছে ভিজে ভিজে;

ঝরা শাঁইয়ের ফুল

নিশাস ফেলে নিরাশ মনে বিষাদ সমাকুল।

কমল বনে নেই কমলা, চঞ্চরীকা চুপ!

বিজন আজি পদুদীঘি লক্ষ্মীছাড়ার রূপ!

কোজাগরের চাঁদ

ডুবে গেছে ছিন্ন ক'রে আলোর মায়া-ফাঁদ।

একটি দুটি পাপড়ি নিয়ে রিক্ত মৃগালগুলি

রক্ত মুখে দাঁড়িয়ে আছে মরাল গ্রীবা তুলি';

ভাঙা হাটের তান

আবিল ক'রে তুলছে হাওয়া ক্লান্ত ম্রিয়মাণ।

দেখছে মৃগাল নিজের ছায়া দেখছে মলিন মুখে,

পদুফুলের পাপড়ি শুকায় পদুপাতায় বুকো!

ভরসা কিছু নাই,

ধোঁয়ার সাথে সন্ধি ক'রে ঝরছে শুধু ছাই।

আকাশ জোড়া আঁখির কোলে জমছে কালো দাগ,

বইছে বাতাস কুণ্ডাভরা দীনের অনুরাগ!

ফিরে সে পায় পায়,

চাইলে চোখে সঙ্কোচে সে চমকে সরে যায়!

ডাগরগুছি কনক-রুচি কনক-চূড়া ধান,

ওই পরশে কেঁপে কেঁপে হ'চ্ছে ম্রিয়মাণ;

শিরশিরে সেই বায়,

ক্ষেতের হরিত কুঞ্জটিকায় ঝাপসা চোখে চায়!

তেঁতুল ঝোপে ডাকছে ঝিঝি, ঝিমিয়ে আসে মন,

মিলিয়ে আসে দীঘির জলে আলোর আলেপন;

BANGLADARSHAN.COM

সূর্য ডুবে যায়,
সন্ধ্যামণি নোয়ায় মাথা সন্ধ্যামুনির পায়!
হাওয়ার মত হাঙ্কা হিমের ওঢ়ন দিয়ে গায়,
অন্ধকারে বসুন্ধরা শূন্য চোখে চায়;
তারার আলো দূর,
কণ্ঠভরা বাষ্প, আঁখি অশ্রু-পরিপুর।
দেউটি জ্বলে আকাশতলে তন্দ্রা-নিমগন,
শাঁইয়ের ঝোপে জোনাক চলে, স্তব্ধ ঝাউয়ের বন;
সুপ্ত চারিদিক,
হিমের দেশে ঘুমের বেশে মরণ অনিমিখ।

BANGLADARSHAN.COM

শিশুফুল

প্রভাত না হ'তে আমরা ঝরিয়া পড়ি,
ফুটিয়া উঠিতে ফুরায় মোদের আয়ু,
ননীর পুতুল-হিমের পরশে মরি
বহে যবে হয় প্রথম শীতের বায়ু।

লাখে লাখে লাখে আমরা ঝরিয়া যাই,
পুলক-পেলব দুধে-ধোয়া শিশু ফুল;
মৃদু সৌরভে হৃদয় ভরিয়া যাই,
শিশির-সজল স্মিরিতির সমতুল!

গণনায় কারো আসি নে আমরা কভু,
স্মরণের পটে থাকি নে অধিকক্ষণ;
অকালে লুপ্ত শিশুদের মত তবু

অশ্রু সুরভি আমাদের এ জীবন!

BANGLADARSHAN.COM

শীতের শাসন

কুসুম-কলি শীতের শাসন চায় গো ভুলিতে!
বিরূপ হাওয়া দ্যায় না তারে ঘোমটা খুলিতে
 আঁখির পাতায় পাতায় জড়ায়, হয়!
 কুহেলি আজ কেবল বেড়ায়, তায়,
ঘুমের কাজল মাথায় চোখে তন্দ্রা-তুলিতে,
 (আঁখি) দ্যায়না তুলিতে!
 আঁখিতে তার বুলায় পাখীর পর,—
 রিমিঝিমি বিবশ কলেবর,
স্বপন-ঘোরে কুসুম-কলি লুটায় ধূলিতে;
 (আঁখি) হয় না খুলিতে।

BANGLADARSHAN.COM

কুন্দ

ফুল হয়ে আমি উঠেছি ফুটিয়া
তোমারি অশ্রু-কণা,
ফিরে চাও ওগো শীতের বাতাস!
উদাসীন উন্মনা!
দুনিয়ার লোক রুধিল দুয়ার
পাইয়া তোমার সাড়া,
রুদ্ধ কবাটে নিশ্বাস ফেলি?
কেন ফির পাড়া পাড়া?
কুঞ্জবনের ঝরোখায় আজি
কাহোরো নাহিক দেখা,
ক্ষুদ্র প্রাণের আরতি লইয়া
কুন্দ জাগিছে একা!
দাঁড়াও দাঁড়াও পউষ-বাতাস
তুষার-শীতল তুমি,
তুষারের মত শুভ্র অধরে
চরণ তোমার চুমি।
যারে তুমি আজ ফুটায়েছ বঁধু
তুচ্ছ সে অতিশয়,
পুষ্প-সভায় সকলেরি কাছে
মেনেছে সে পরাজয়!
তবু সাধ তার ছিল ফুটিবার
সে সাধ পূরিল আজ,
ওগো দক্ষিণ উত্তর-বায়ু
তুমি ভেঙে দিলে লাজ।
গোলাপের দিনে ছিল যে গোপন,—
কমলের দিনে ম্লান,—
তারেও ফুটালে ওগো অতুলন
এই তো তোমার মান,

BANGLADARSHAN.COM

এই তো তোমার গৌরব, ওগো!

কেন দূরে যাও তুমি?

দাঁড়াও, দাঁড়াও, তরণ অধরে

চরণ তোমার চুমি।

ধূলির নিকটে ফুটায়েছ তুমি

প্রথম চাঁদের কলা,-

শকুনের পাখা কুয়াসার ঢাকা

বনের শকুন্তলা!

চ'লে যেয়োনা গো নিঠুরের মত

কঠোর করিয়া প্রাণ,

তোমার পূজায় একটি কুসুম,-

একটি জীবন দান।

সে জীবন অতি ক্ষুদ্র জীবন,

সুষমা নাই সে ফুলে;

নিরালার মাঝে সঙ্গী সে তবু,

আলো কুহেলির কূলে।

ওগো সহৃদয়! মদেকসদয়!

দাঁড়াও দাঁড়াও তুমি;

কুণ্ঠিত কুঁড়ি ধন্য হইবে

তোমার চরণ চুমি'।

BANGLADARSHAN.COM

কাঞ্চন ফুল

আমি বনানীর কর্ণভূষণ
সুন্দর পরিপাটি,
নাম 'কাঞ্চন' হাল্কা গড়ন
মধুপর্কের বাটি!
মধু-পিঙ্গল কিরণ মধুতে
যবে উঠে বুক ভরি'
দেবতার পায়ে তখনি নিজে
নিজে নিবেদন করি।
মৃদু পরশেই 'নোনছা' লাগে গো,
তাই দূরে ফুটে আছি,
ক্ষীর সাগরের মৃদু ফেন-লেখা
আমি জোছনার চাঁছি!

BANGLADARSHAN.COM

ফুলের রাণী

দেখা হ'ল ঘুম নগরীর রাজকুমারীর সঙ্গে,
সন্ধ্যা-বেলায় ঝাপসা ঝোপের ধারে,
পরনে তার হাওয়ার কাপড়, ওড়না ওড়ে অঙ্গে,
দেখলে সে রূপ ভুলতে কি কেউ পারে?

চোখ দুটি তার তুলু তুলু মুখখানি তার মিঠে,
আফিম ফুলের রক্তিম হার চুলে;
নিশ্বাসে তার হান্সু-হানা, হাস্যে মধুর ছিটে,
আলগোছে সে আলগা পায়েই বুলে।

এক যে আছে কুঞ্জটিকার দেওয়াল-ঘেরা কেব্লা,-
মৌনমুখী সেথায় নাকি থাকে!

মন্ত্র প'ড়ে বাড়ায় কমায় জোনাক-পোকাক জেব্লা,
মন্ত্র প'ড়ে চাঁদকে সে রোজ ডাকে!

তুঁত-পোকাতে তাঁত বুনে তার জান্লাতে দেয় পর্দা,
হতোম প্যাঁচা প্রহর-ফাঁকে দ্বারে;
ঝর্ণাগুলি পূর্ণ চাঁদের আলোয় হ'য়ে জর্দা
জলতরঙ্গ বাজনা শোনায় তারে!

কালো কাঁচের আর্শীতে সে মুখ দেখে সুস্পষ্ট,
আলো দেখে কালো নদীর জলে!
রাজ্যেতে তার নেইক মোটেই স্থায়ী রকম কষ্ট,
স্বপন সেথা বেড়ায় দলে দলে!

সন্ধ্যাবেলার অন্ধকারে হঠাৎ হ'ল দেখা
ঘুম-নগরীর রাজকুমারীর সনে,
মধুর হেসে সুন্দরী সে বেড়ায় একা একা,
মূর্ছা হেনে বেড়ায় গো নির্জনে!

BANGLADARSHAN.COM

ফুলশয্যা

মিলন ফুলশয্যা হ'বে কুড়িয়ে-আনা ফুলে,
ছিঁড়ে করেও নিতে যে জল আসে আঁখির কূলে!

যদি গো কেউ আপন বেসে

আপ্নি আসে মধুর হেসে

যত্নে নেব তারেই আমি বুকের 'পরে তুলি,
মোদের ফুলশয্যা হ'বে শিউলি-বকুল ফুলে।

মোদের ফুলশয্যা হ'বে রাঙা গোলাপ ফুলে,—
পাপড়িগুলি পড়বে যখন আপনি খুলে খুলে!

নইলে সাধের সোহাগ যত;

ঠেক্বে অপরাধের মত;

মিলন-রাতি কান্না সাথী করব না তো ভুলে,

মোদের ফুলশয্যা শুধু আপনি-ঝরা ফুলে!

মোদের ফুলশয্যা হ'বে গভীর আত্মদানে,—
শিউলি, বকুল, ঝরা গোলাপ, পদ্মুরি মাঝখানে!

বল্বে যে দিন মনের পাঁজী

হ'বে সেদিন আপ্নি রাজী,

প্রাচীন বাঁধন শিথিল ক'রে মিলবে প্রাণের টানে

মোদের মিলন হ'বে শুধু স্বাধীন আত্মদানে।

BANGLADARSHAN.COM

ফুল-দোল

জগতের বুকে লহরিয়া যায়
হরষের হিল্লোল!
ফুলে ফুলে দোলে পুলক-পুতলি
ফুলে ফুলে ফুল-দোল!
উৎসারি' ওঠে অশেষ ধারায়
অভিনব চন্দন;
রেণুতে-রসের বাষ্প-অণুতে
পুলকের ক্রন্দন!
সদ্য মধুতে সৌরভ ওঠে,
বায়ু বহে উতরোল!
দুলে দুলে ওঠে পরাণ-পুতলি,
ফুলে ফুলে ফুল-দোল!
চাঁপার বরণ তপনের আলো,
চামেলি চাঁদের হাসি,
কূলে কূলে আঁখি ভরিয়া ওঠে রে,-
অশ্রু-সায়রে ভাসি!
কঠিন মাটিতে লহরিয়া যায়
হরষের হিল্লোল!
হৃদয়-দোলায় পরাণ-পুতলি,
ফুলে ফুলে ফুল-দোল!
ফুলে ফুলে সুধা-গন্ধ জাগিল।
জাগিল কী এক ভাব!
হৃদয়ের কোষে হ'ল আজি কোন্
রসের আবির্ভাব!
নয়নে নয়নে নয়ন-পুতলি
আলোকেরে দেয় কোল!
পরাণ-পুতলি পরাণে পরাণে
ফুলে ফুলে ফুল-দোল!

BANGLADARSHAN.COM

নির্মাল্য

ফলে পরিণতি হ'ল না যাহার
নিষ্ফল সেই ফুলে
ভক্ত সঁপিল আঁখি জলে তিতি'
দেবতার পদমূলে।
দেবতার পায়ে জীবন ঢালিয়া
সেই চির-ফলহীন
জগতের শিরোধার্য্য হ'য়েছে;-
হয়েছে গো অমলিন
শোভাহীন তার শুষ্ক পাপড়ি,-
আজি জগতের চোখে
অলোক-আলোকে মগ্নিত,-সে যে
আশোক-বারতা শোকে;
দৈব অভয় সে যে দুর্গম
দূর গমনের পথে!
দেবতার বরে নির্মল করে
নিষ্ফলও এ জগতে!

BANGLADARSHAN.COM

প্রাণ-পুষ্প

আমার পরাণ যেন হাসে

ফুলেরি মতন অনায়াসে;

চাঁদের কিরণতলে,

বরষার ধারা জলে,

শিশিরে কিবা সে মধুমাসে;—

ফুলেরি মতন অনায়াসে।

সব সঙ্কোচ শোক

কুণ্ঠা শিথিল হোক,

আপনারে মেলিয়া বাতাসে,

নবনীত-নিরমল

খুলিয়া সকল দল

সার্থক হোক মধু-বাসে;—

ফুলেরি মতন অনায়াসে।

BANGLADARSHAN.COM

পারিজাত

এ পারে সে ফুটল নারে ফুটল না-
ও পারে যে গন্ধে করে মাত;-
ও পারে যার রূপ কখনো টুটল না,-
নামটি-ও যার নামটি পারিজাত!

এ পারে তার গন্ধ আসে উচ্ছ্বসি',-
মুক্ত হিয়ায় হাওয়ায় মেলি হাত;
ও পারে তায় মাল্য রচে উর্বশী,-
স্বপন-মাখা মৌন আঁখিপাত!

স্বর্গ-ভুবন মগ্ন-গো তার সুগন্ধে,
ফুটেছে সে মন্দারেরি সাধ;
ইন্দ্র তারে বক্ষে ধরে আনন্দে,

অনিন্দ্য সে পারে পারিজাত!

এ পারে তায় হরণ ক'রে আনবে কে?—
মৃত্যু-সাগর করবে পারাপার?
তাহার লাগি' বজ্রে কুসুম মানবে কে?—
স্বর্গে হানা দিবে বারম্বার?

ঐরাবতের মাথায় অসি হানবে কে?—
প্রিয়ায় দিতে পারিজাতের হার?
পারের পারিজাতের মরম জানবে কে?
কে ঘুচাবে প্রাণের হাহাকার?

এ পারে কি কল্পনাতেই থাকবে সে!—
নাগাল তারে পাবে না এই হাত?
সোনার স্বপন-মরণ শেষে ঢাকবে সে,
চির সাধের পারে পারিজাত!

॥সমাপ্ত॥